


MWEETELO WA PROFETA

EEKEEKHAI A MULUKU

 Vano, mooxeliwa, apatthani. Voosiisu wooreera, ni okathi wooreerela okhala va. Kootteeliwa murima okhala mukumi voosiis'ula, ni okhala-tho va ni muthukumano. Sookhala itthu sinci-ene sikanle okhumelelaka mwa okathi vakhaanixa. Ni hiyo khanisuwenle okathi zeeni onrowaahu wiitthaniwa, wira naakhule, osulu Opwaro yuulupale. Ni nintthuna nikhale oolikana khula okathi, wira niwerye okhalana murettele.

² Ni nkireere oxukhuru, ntoko sihimalyaaka. Vekeekhai, kaari vaava Ttiminku ohiyu, ni kaalavula n'atthu. . . Kaahilaleerya Ttiminku ohiyu, ni kintthuna kimuxukhuru Munna Roberson, othene nyuwo othene mulikanri, mwaha wo woosivelani Mutthak'ole wa Ttiminku ohiyu, "Hiyo nookhalana itthu sothene." Ni siiso miyo. . . Mwa hata okathi nkuupuwenle wira kaamurowa olavula, kaarimoorwa paahi khunweha Munna Neville. Va—vammilo vawe vaakhala wira waari-vo enwi. Miyo khuupuwela, "Munna oohaawa, owo akiitthanaru ohiy'ula, kinoorowa omukhaliherya, wala wira sothene sinweryaaka." Okhala wira, miyo koosuwela exeeni iyo, okathi munkhulumuwaanyu ni olala vammilo, ni owo aahilaleya voolipa voosiis'ule. Nto siiso miyo—miyo khulavula voopuroni vawe Ttiminku ohiyu. Nto siiso hiyo nri—hiyo nri. . . Miyo kinnooxukhuruni, vanci-ene.

³ Vano sookhala soovekela sinci-ene, eniiriwa, sa mavekelo. Vano nto nrowe nuupuwele seiyo, toko, soovekela iya sothene. Nrowe nuuramihe muru vano.

⁴ Tith'ihu a Wirimu, yolempwa wira naahaana ovolowa mmithukumanoni Mwanyu ni oxukhuru mmurimani mwahu, osuweliha soovekela sahu mmithukumanoni mwa atthu Ooreera murima. Ni nookhalana sinci-ene saya, voosiis'ula, sinci-enexa, nihinsuwelaahu moota wo ophwanya owiriyana Wanyu, masi Nyuwo munnisuwela. Sookhala sinci-ene sihihimmwe. Nyuwo munnisuwela seiyo, nave. Tivo, hiyo ninvekela ni murima ahu wothene, ntoko saamwiirenlyaahu Ettiminku evinre ohiyu, mwaana a Munna Shepherd muthiyana, ni a Munna Shepherd mulopwana. Iwe okathi e. . . Etthikaka, Erooho Yoowaarya khwira, "Owo khorina hata esupiyaani. Owo onookhala saana." Osivelihwiwa zeeni onkhalanaahu naawiiwakani Nyuwo.

⁵ Vano hiyo ninvekela voosiis'ula wira Nyuwo munivahe soovekela iya mwaha wa eretta, mwaha wa etthoko ya muxankiho, w'ale oophentiwa, ni sothene sihimmwe, Tithi. Hiyo

ninkekela wira Nyuwo mmuupuwele khula mmosa. Ni miyo kinnivahererya nivekelo naka, ni mavekelo a atthu ala, ohoolo Wanyu; nithukumanne, ni ninveleeliha wa Nyuwo, mwa Nsina na Yesu Kristu. Muniiwe, Tithi, hiyo ninnivekela. Amen.

⁶ Kintthuna kimuxukhuru khula mmosa a nyuwo othene mwaha wa mavekelo anyu wa miyo. Okathi miyo. . .Nyuwo moosuwela wira kaahikhalana erumelo yaamukhaani opuwani wa ipholovolo iwe. Nto Satana aaphavela okiiva. Nto—nto, vekeekhai, owo khuhiwerya wira. Huh-um. Nnari. Muluku khaamalinhe ni miyo nlelo. Tivo owo khonwerya wira mpakha omala. Muluku amaliharuru, nto koolikana. Masi miyo. . . Mpatthani aka ooreera murima, Munna Wood, ohitto iwe, omoriwa ikharari paahi wa Muluku, ahiiso aamphwanya okhuma *nno* orowa vathi, ni kahi okhuma *nno* orowa osulu. Yaari ephutuwelo ya itonelaata thanu wala thanu na mosa so waattamela wiitho waka, *siiso*. Khektivulalinhe hata vakhani. Munnona? Erookipera wiitho vakhani. Vano, eyo, ahe, yothene yoolakaseya vano, nlepa naamukhaani paahi nihanle *vo*.

⁷ Tivo, kintthuna kimuxukhuru Munna mulopwana ni Munna Muthiyana Dauch va. Munna Brown, n'akina, kiiwale-aka kivaanelaka mutelefoonini wira awo yaahithukumana vamosa, nikhuru n'atthu, khukivekelela. Nto eyo etthu emosa paahi, eniwiirihani etthu. Moosuwela, nyuwo munaavekelela akina, ni sothene, vano nto nyuwo mwaasuwelaka wira mutthu onimoovekelelani okathi mumphavelaanyu, eyo ennihimya etthu vanci-ene. Ni miyo koosuwela wira anci-ene a nyuwo khimulikanri, wala etthu p'itthu, masi nyuwo muhiira yeeyo. Ni ennihimya etthu vanci-ene wa hiyo. Nto mwaha wa yeeyo miyo. . . eyo ehikivulalinhe aya. Muluku ookitthuniherya okhala saana. Nto siiso miyo nkireere oxukhuru.

⁸ Vano, kookhalana mihupi kamosa-kamosa okathi vakhani nihinatthi waavahererya axinamwane ala. Vano, ohiy'ula, wookhala muteko w'okokhorela otapernakulu. Ni nyuwo othene munrwa va otapernakulu, murwe mukokhorele va. Nto siiso hiyo nri. . . Kinrowa omulaleerya Munna Ruddell, ohiy'ula, osulu nno ephiro yuulupale, mmosa w'axinn'ihu annithotola. Vano nto, kitthikaka-ru, kakhalanaru ohiyu mukina, kintthuna orowa wa Munna Junie Jackson. Vano munn'ole oSellersburg, hiyo nihaana ohiyu umosa wa yoowo iwe, vano nto nintthuna nirowe namoone. Vano munna oUtica, niphavelaka ohiyu ula ntoko sinweryaahu.

⁹ Esuman'ela kinookhuma orowa oGreen Bay, Wisconsin, ntoko sinsuwelaanyu, orowa omuthukumanoni wa elapo w'Alipa a Nakoso a Ehapari yooreera Yoomalela.

¹⁰ Ettiminku enrwa, kinrowa okhala oxikola sekuntaariya, iwe, kaaryaaka-wo okathi wookiserya wu. Kinooliyala nsina na autitooriyu ule muulupale a exikola. [Munna mmosa oniira,

“Mather.”—Mol.] Ti nvi? [“Mather.”] Mather. Stephen Mather. Ayo. Vaareera. Autitooriyu a exikola sekuntaariya.

¹¹ Nto nuumala, Sekunta, kinrowa okhala omuthukumanoni weiwo kaarinaaka-wo nvaanelo ni asosiyasawu ministeriyale oChicago, emaara yookiserya wu. Ninrowa okhala nipuro nenlo mwaha wa muthukumano wo olaihana ni Munna Joseph Boze, yoowo onrowa oTankanyika. Tankanyika, ntoko siniitthanaawe. Ni Keniya, ni Durban, ni weiwo, otthokihaka mapuro a mithukumano saka sinrwa okathi w’ephovo; ni wAfrika, ni ovira wAfrika du Sul. Vano nto hiyo ninoovekelani wira munuupuwele mmavekeloni mmithukumanoni seiya. Nuumala ninootthika.

¹² Ni nkinsuwela sintoko kookhalana okathi wo okuxa, nihiku nikina mutapernakulu, wala nnari, nihinatthi orowa nto oCarolina du Norte. Nto numala, okhuma weiwo, orowa oCarolina du Sul. Nto nuumala mpakha oCow Palace oLos Angeles, oSouth Gate. Nto iwo ti weiwo onwehereryaaka orowa ni omoona Mwenye Weatherby, yoowo ompanke kapwitthi mwemmo ekartuusu yaaphutunwe-aya.

¹³ Owo khaarina opuro wa muru woophiyerya mpakha ottuli, nto eyo khwiiriha epholovolo otthikela ottuli ohiya orowa ohoolo. Aari kapwitthi a khalayi kaanveleelihenrye-aka. Owo khuruma wira ottyuuliwe, nto, ni khimurukunxa okhala kapwitthi a muthinto mukina. Miyo kihela-mo epholovolo, kimuttukhula wira kimoope, nto owo, ahe, khumooapa kapwitthi imeeturu soophiyaka ntoko miloko mithanu kaaryaaka-vo, *siiso*, khutothowa mmatatani mwaka. Mpompe khukhuma mpakha eliinya ya imeeturu miloko mixexe ni thanu na mosa, ntthere khukhumela ottuli mpakha ottuli wa ekayela ya itthove, imeeturu miloko miili ni thanu na piili, miloko miraru ni thanu na mosa ni nuusu ottuli waka, ni itathela sa eyuuma khuvava khuthikila mapapatthu a miri ni sothene sikina. Vano eyo yaari vakhiviru so ni niitho naka, sintoko epolekaata emosa paahi, vaavo yaaphutunwe aya siiso. Ni yaaphutunweru. . .

¹⁴ Vano kapwitthi ule onnikuxa ikhiilu ikonto tthaaru sa ekhittelo, yoowo ene, ohirumme. Vano munoowerya otthokelela ekhittelo kavi yaari mwa yeeyo, wira yiire yeewo. Ni muupuwele, vakhala wira aahiruma siiso, vaamuweryaneya ophutula muru aka ni makhata nave, moone. Masi yaahikhala Apwiya yeemenle vaavale, yahaatthunihenrye nnakhala okivulaliha, yaarookipera paahi wiitho. Ni etathela yaamukhaani khukela vathi va niitho naka, khumpaka anela orukurerya eyoonelo, vano khiyaakwanyale eyoonelo, vaavo etathela yaakenlyaaya. Emosa wa ikapatti suulupale yaakenle munikarakasani na muru yaaronwe vaniithoni, khuhikela muniithoni, nnya. Oh wulu!

¹⁵ Woohikhala khalayi, munnuupuwela, kaahooleelani wira Owo aahikumana ni miyo mpaani, khwira, “Muhoove,

Mukhalelo wa Yesu Kristu ohinivonyaka ori ni nyuwo mahiku othene.” Munnona? Munnona? Vano eyo ennooniherya, wira Owo ookhala.

¹⁶ Tothoro mmosa aamwaleiye niitho naka oLouisville, iirale wira yaahilepa amwaakhulaka Dr. Sam Adair ohitto nno, mpatthani ahu, khwira, “Etthu emosa paahi kikhanly’aka ohimyaka, wira Apwiya yaakilaanthe weiwe voosis’ule ni murumeyi Aya wira emukhapelele, ahiiso owo khuwaarowa omuhaleela hata muru nnakhala makhata.” Tivo, Awo khareere okireerela murima, ni miyo kinnixukhurela yeeyo. Ennikiruhaxa vakhiviru vakhani. Kweekwe ennikhaliha etthu yoovirikana vakhani.

¹⁷ Vano nto, mahiku maili nuumala yeeyo, mahiku mararu, kaarowaaka omuthukumanoni waka, kaathhokihenryaaka oCanada, mulopwana, ohisuwelaka etthu ya yeela, khukiitthana, ni kaahaana wunteerya muthukumano. Munnona? Kaamukhala mphironi kirowaka, etthu ila yahiiraneieye siiso. Munnona? Nto siiso khwiitthana, ni kihaana orowa omuthukumanoni, muthukumano wa oCanada. Nto eyo enrowa okhala Julho, isumana sookiserya Julho. Nuumala kinrowa oDawson Creek, nuumala oAnchorage, Alaska, Apwiya yatthuna vale.

¹⁸ Vano, khuwaavo hata mmosa wa mithukumano iya keetthiheriwaaka orowa-wo, nnakhala mmosa. Masi nkikhanle wuupuwelaka okhala kikilaanthe-ene weno elimwe yothene, okilaathi weno, ni atthu akhwaaka mapuro othene. Kihaana waala Ipyo, khula mapuro, hata wira exeeni. Yaahimele, axipalame a musulu yakhuura vale, etthu p’itthu, miyo kintthuna waala Ipyo, okhala wira Owo ookivaha etthu yo waala. Vano miyo—miyo kinrowa waala Epyo khula enamuna. Vano, hiyo nookhalana okathi va miyo. . .

¹⁹ Atthu anci-ene, ele aniihanaaya, “waapatisa” anamwane axikhaani mowaaminini w’oKristu. Ahe, ti yoolikana, mwaairaka yeeyo. Ti nyuwo munsuwela. Tthiri, awo khanaapatisa vekeekhai. Awo anaathela maasi paahi vasulu vaya. Masi, wa miyo, miyo onkisivela okhala n’ile Bibilia ohimmyaawe wira niireke. Tivo, vekeekhai ele Masu ahimmyaaya, ti yeeyo kintthunaaka wira, etthu p’itthu Awo ahimmyaaya. Nto, vano, miyo—miyo nkimphwanya hata nipuro mBibiliani. . .

²⁰ Mwa Waataana Wa Khalayi, yaaruhiwa aana wira elyihwe masoma veerutthuni, anamwane alopwana, vano maama aavaha mukuttho wa oreerihwa, masiya maili wala mwaapwittipwitthi.

²¹ Masi, mwa Waataana Wa Naanaano, nipuro nimoso paahi kikhanly’aka ophwanyaka ntoko otthapela mutek’ola muulupale wa. . . Waari ovahereriwa. Awo yaaruuhale anamwane wa Yesu, nto Owo khwaakuxa mmoononi mw’Awe khwaareeraha. Ti yeeyo axitiithi yiiraaya a mahiku Awe. Ni

makhalelo Awe yaari ethoonyeryo wa etthu erinaahu wira. Munnona? Itthu iya Owo iirale ntoko ethoonyeryo.

²² Vano, hiyo ninwaakhela axikhaani, ntoko aniruuhiwaaya wa hiyo, nto hiyo ninimwaattukhulela wa Muluku, ni ovekela iparakha sa Muluku wa yaawo, ni ovekela nivekelo na ovahererya okhuma wa maama ni tiithi, mpakha wa Muluku, okathi animuruuhaaya mwan'aya. Ni...wala waavahererya mwa Nsina na Yesu Kristu, mpakha awo wunnuwa voophiyerya wira epatisiwe mwa Nsina na Yesu Kristu. Nto vano, Owo ohimnye wira, "Sothene siniiraahu mwa nuulumo hata ni miteko, niireke sothene mwa Nsina na Yesu Kristu." Vano—vano ti yeeyo hiyo entthunaahu wira.

²³ Nto vano, munna oopaka nsipo nla naamukhaani voomaaleleya, munna, nrinaahu va, *Mwaaruuhe*. Ni aximai n'axitiithi arina anamwane ala axikhaani ahinatoko ovahereriwa w'Apwiya, mwaruuha-ru naanaano va, okathi muthukumano, niwiipelaka yaawo voomaaleleya vano, nsipo. Ayo.

Mwaaruuhe, mwaaruuhe,
Mwaaruuhe axikhaani wa Yesu.

²⁴ Miyo kinnaphenta axinamwane ala. Yookhala etthu mwa yaawo ekhanle yoosivela.

²⁵ Kinoona wira ola mwItaliya voomalela. Kahiyo? Vaareera. Amusi aItaliya, vakhani ari wira avahereriwe. Mwamunna mmosa muthiyana mwItaliya va a, oh, a oChicago, ori vaava. Iirale, "Ela etthoko ya aItaliya, voosiis'ula, masi nkinrowa olaleya."

²⁶ Nsina nawe ti pani? Jonathan David, nsina xeeni nooreera! Vano, Jonathan. Owo ohimnye wira atithi awe yaarina n—yaarina nsina na wItaliya, ni owo aarina. . . Owo onthuna wira mwan'awe ovahiwe nsina na mBibiliani.

²⁷ Moosuwela, aahikhala mwItaliya mmosa muulupale mBibiliani, aaitthaniwa Kornelio, emaara emosa, moosuwela. Owo aahikhalana muloko, ni aari ooreera murima, ni aanaavaha isimola atthu, oryeene Mmalapo, nave. Munnimusuwela wahala ene. Nto nihiku nimosa Nlaikha naahirwa owannyawe, khimuleela wira aroweliwe mulopwana mmosa aasuwela mutthokiheryo wa Muluku. Ni owo. . . Nyuwo munnimusuwela wahala ene. Okathi, owo aahikhalana atthu ale mwa omuttittimiha Muluku! "Petru nlelo alavulaka Masu ala, Erooho Yoowaarya yaahaakhuruwela." Ti yeeyo. Miyo kinvekela wira mwaan'ola akhale muthinto mmosaru wa mutthu, nsina nimosaru.

²⁸ Jonathan, nooreera! Kimukuxeke? Rwaakani, Jonathan. Wulu, nipattuuxa xeeni na esokhari wa emusi ela!

Nrowe nuuramihe muru.

²⁹ Tith'ihu a Wirimu, miyaakha soovira, ntoko wahala miyo kimanlyaaka omuhimya, a mulopwana mmosa muulupale aaitthaniwa Kornelio, aari mutthu ooreera murima, naxariya, aavaha isimola ni omphenta Muluku. Nto Nlaikha na Muluku naahirwa owannyawe mulopwan'owo. O Muluku, hiyo ninnoovahani Nyuwo, voosiis'ula, Jonathan David mwaamukhaani. Miyo kinnivekela, Tithi a Wirimu, wira ntoko simukunxaaka okhuma mmoononi mw'ame awe n'atithi awe, yaawo animuruuha wa Nyuwo...Miyo kinvahererya nivekelo nla na ovahereriwa wa ekumi ya mwaan'ola wa makhalelo a muteko wa Nyuwo, eparakha ya etthoko, nluku nuulupale n'okeleliha ohoolo Ekereja. Munivahe, Tithi. Miyo kinnimuruuha wa Nyuwo Jonathan David mwaamukhaani, mwa Nsina na Yesu Kristu. Amen.

³⁰ Muluku oovaheni mahala Awe ni ookhaliheryeni omulela ni miruku sa Muluku.

Mureerihiwe, Jonathan David.

³¹ Vano, ola, wulu, owo mmiravo saana, wala owo muthiyana? Mulopwana? Wulu, mulaleyi mukina onoorwa, kinniroromela. Nsina ti pani? Micah. Micah. Kinlavula sa yoowo voosiis'ula. Micah Edward. Edward, nlo nsina nooreera. Vano, amwaar'aka yaamuwerya wira yeela vooreeraxa vaaphiyeryaka omukuxa, okhala wira kweekwe kinnoova owunta aryeene akhaani. Munnona? Mwaamukhani oosivela, maithe awo makhaani anwehaweha paahi. Khoreere oyeve. Orina miyaakha mikavi? Mweeri mmosa.

Nrowe nuuramihe muru.

³² Tithi a Wirimu, anaithoko ala amiravo aanrwa-tho va wira evahererye wa Nyuwo iphwanyeryo sa ophitaana waya wa ekumi Nyuwo mwaavanhe-anyu, wira amuleleke ni miruku sa Muluku. Mmureerihe Micah ula mwaamukhaani. Muluku, miyo kinvekela wira Nyuwo munkhalihe mulopwana ntoko Mikaya mBibiliani. Munivahe yeeyo, Tithi. Munvahe iparakha sa Muluku. Mwaareerihe atithi awe n'ame awe, ni mmukhalihe muupuxeryo va elapo ya vathi, nluku nuulupale nookeleliha ohoolo niwoko na Kristu. Nto vano, muniwe, Tithi, miyo kinimuruuha wa Nyuwo, okhuma mmoononi mw'atithi ni ame awe, mpakha mmoononi mwa Muluku, Micah Edward mwaamukhaani, mwa Nsina na Yesu Kristu. Amen.

³³ Apwiya emureerihe, yooreeriheni nyuwo, atiithi n'amai, wira mmulele ni miruku sa Muluku.

Kookupali wira ti yeeyo. [Nipuro vahiitthu mufiitani—Mol.]

³⁴ Oh, miyo okisivela axinamwane awo, khula mmosa tu. Wira, khula mmosa, mwaana ootepa oreera mulaponi. Khivantthuneya tu...Okathi omuruuhalyaaka Joseph mwaamukhaani owaani, owo aari, voohithepya, mwaana oonanaraxa kaatonko aka omoona, masi ame awe ni miyo noona wira aari mwaatteepea.

Masi ti siiso ery'aya, moosuwela. Eyo ti...Hiyo paahi ninuupuwela yeeyo.

³⁵ Miyo kinniikoha, voosiis'ula, mamempuru ahu amosa-amosa va. Yaahikhala e—e...Vano, niitho *nla* nihaana beladona, ninkhala noottweelela saana. Masi Munna Nash muthiyana... Kimukohererya Munna Nash mulopwana; kinniikoha sinto aahikhala saana. Ti...Awo arisa vaava? Oh, ahe, ayo, owo ori vaava. Attotopeliwe Apwiya, Munna Nash. Eyo, ti yooreera.

³⁶ Vano, Munna Edwards muthiyana, ori vaava? E...Wala, Munna Shepherd muthiyana, aarina mwaaruusi, aawereiwa, owo ori saana vano? Vaareera. Kihaakhela ihapari, etthu ene okhala wira mwa minuutu soophiyaka mithanu kaahiwaakhela athu, ota wa epooma, yaatthuna nvaanelo. Miyo kivolowa kaakuvaka okatthi ni kivekela, ni ehimmwa wira mwanamwane aarina esupiyaani, miyoono ni metto saamuuma. Vano miyo khuvolowa kaakuvaka wira kavekele, nto khwira, "Miyo kinimoorwa nuumala muteko wo okokhorela." Kimuleela Loyce wira amulikarele ni amuleele muhano owo wira kaamukhala weiwe nuumala muteko wo okokhorela; vakhala wira aamukiphavela, akiitthane. Nto vavolonwaaka wira kavekele, Erooho khwira—khwira, "Khekhanle esupiyaani. Owo onookhala saana." Miyo khurwa, ahe, hiyo othene naahikhalana mavekelo va mukereja. Eyo yaahimaliha mwaha.

³⁷ [Munna mmosa muthiyana oniira, "Munna Branham?"—Mol.] Ayo, muthiyana. ["Hiyo naahirowa wa tothoro Sekunta, vaamanlyaanyu onvekelela emaara yoopacerya, nto mafuwa othene vatthirima wawe othene aamala, aakhuma vammilo wawe."] Attotopeliwe Apwiya! Mavekelo annirukunxa itthu.

Muniira, owo khokhanle vaava, voosiis'ula, ookhala, ntthepa? Ayo.

³⁸ Ettiminku evinre, emaara yookiserya kilaleiyaaka va, Ettiminku esumana emosa, aahikhala mmiravo mmosa aakilaanthe va; Miyo kaakhala kinwehaka. Miyo khuupuwela, "Kihaana omusuwela mmiravo ole." Nto khuphiyerya osuwela wira, owo aari mwaana a muxirikha aka a khalayi a oxikola, Jim Poole. Vano, hiyo nileliwe vamosa, okhuma niryeene, aximiravo. Ti yoowo kaakhalanne aka ehasara ya kapwitthi, okathi ule, vano nto ohoolo waya owo aahikhalana emosa mmansawe, nto mpatthani aka. Kinniroromela wira kinoowerya omweettiherya mmirav'ole wa Kristu. Nkireere ophavela ni atithi awe. Kookupali wira kinimwiira, nlelo, kinoomuruuha. Kinroromela wira kinoowerya omweettiherya mmirav'ole. Owo aahikhalana e...Miyo kimuweha. Aakhala wira aahikhalana yooreera, yeeyo eniitthanaaka vano (muhihimye ni hata mutthu mukina), masi, ethukumelelo ya erooho awe, moonelo wooreera. Kookupali wira khunrowa otthuneya vanci-ene omuroiha mmiravo owo wa Kristu. Tivo nrowe ninvekelele. Ti yeeyo.

³⁹ Nto, munna, moone, ookhala mutthu mukina-tho aawereiwa, wala etthu, yoowo kimpavelaaka omuupuwela.

⁴⁰ Khula enamuna, ninaavekelela othene. Nto okathi imaara sikina...Nyuwo mwaavelelihaka yoovekela, muupuwele, kimalaka-ru waakhela...Amwaar'aka ari mpaani nipuro nlo, woona waka, tivo awo annisuwela. Kimalaka-ru waakhela yoovekela, kinrowa osaala waka wa oskiritooriyu, kinrowa ovekela, n'ukhala weiwo mpakha woona etthu. Miyo nkinihiya tu.

⁴¹ Nihiku nlo, okathi Sam, Dr. Sam, aakumihalyaawe etthu iyo mmaithoni mwaka, owo aaphavelaawe, ni yaaninwereya vanci-ene, owo aahaana ohela etuwaya wiitho waka. Khwira, "Nkinwerya woona ephome ya mpatthani aka." Khwira... Vano miyo kaahinaana ephome, nyuwo moosuwela. Owo khwira—owo khwira, "Nkinwerya tu wira eyo n'uvara muteko mwa yeeyo." Munnona? Nto siiso owo khukumiha eyo. Nto mmeeloni mwaya owo aari oxipiritali. Vano miyo khunvekelela, khukhuma saana.

⁴² Vano nto mmeeloni mwaya, amwaar'awe, hata khiyaasuweliwa exeeni yahaalonke n'awo, yuupuweliwa wira yaaphwanya esupiyaani. Munnona? Khwira, ni khwiiriwa... Vano khwaavekelela, vano ari owaani akumi. Vano hiyo khuvolowa musaala, Doc...Khuvolowa muskritooriyu, nto owo...Hiyo khuwala mukhora, khwira, "Vano, Munna Bill, kinrowa wookohani etthu." Khwira, "Munookivekelela miyo ni Betty?"

Miyo khwira, "Nrowe. Nivekele."

⁴³ Vano, owo ti ole Apwiya yaamoonihenryaaya yoowoona, ya nipuro n'oteka-vo ekleinika. Nyuwo, munnimuupuwela wahala ene. Mwatonko ene ohoverya, murowe mwamukohe khula okathi. Ayo, owo iirale, "Khula mutthu arweeke." Khwira, "Miyo kihaalela atthu ikonto muloko."

⁴⁴ [Munna mmosa oniira, "Munna Branham?"—Mol.] Ayo, munna. ["W'ale va voosiis'ula ni wira muhele-tho waamini mmurimani mwa akina: Ettiminku ya Paasikha voosiisu, nyuwo mwaahitthana munepa wooreeraxa va, wa neeraru, yoowo aari mulopwana. Nyuwo khuhimya wira aakhuma oSeymour. Ni nyuwo mwaahimye, ni muttikitthelo wa Erooho Yoowaarya, 'Awo aniwiihanani, "Bill." Miyo kinnimusuwela mulopwan'owo. Kinnimusuwela saana. Nto vakhumme ahu va, nsina nawe ti Isaac. Awo animwiihana 'Bill.'"] Ayo, mulopwana. Munnona?

⁴⁵ Nsina nawe n'ekeekhai ti Isaac. [Munna oniira, "Ti yeeyo."—Mol.] Masi animwiihana Bill. ["Ti yeeyo."]

⁴⁶ Erooho Yoowaarya khenivonya. Ti yoohivonya. Vano, ola, mutthu mmosa aamulavula, khwira...Miyo ka—miyo kirina miyaakha miloko mithanu ni miraru, ni milo-...miyaakha

soophiyaka miloko miraru ni mmosa, kinnikhalaka ottuli w'epulpitu, ni kinnimoonaka Owo mwa itthu ikonto miloko sene.

⁴⁷ Nsana, miyo kaari wu, wuuwu, epante y'okuusini wa oKentucky, omukaanoni ni Tennessee, ni kaakilaanthe mukalawani ni Munna Daulton, yoowo Apwiya anvahalyaaya an'awe othene. Munnuupuwela voosiisu va, okathi owo opaceny'awe. Nto owo khwira, "Munna Branham," khwira, "Kinoona wira yaamukhala yoorika wa nyuwo waalikela."

⁴⁸ Miyo khwira, "Oh, Munna Daulton, imaara ikonto miloko sene vaara ikonto miloko sene sa itthu siiso."

Khwira, "Muhineeheryela-ni olepa eliiivuru" (miyo khwira . . .) "ya yeeyo?"

⁴⁹ Miyo khwira, "Oh, wulu, Munna Daulton, eyo ya—eyo yaamukhuneela mwaatiya ola va, ensikolopeetiya, ivuluume paahi sa iliivuru sa itthu kiwoonalyaaka Apwiya wira. Ni khiwaavo hata okathi mmosa Awo atonko aya ovonya, moone, nnakhala emaara emosa; masi, yoolikana khula okathi."

⁵⁰ Kinnoona, kinnaamini vano, kaahivonye vale, mwaana muthiyana a Munna Shepherd, owandre evistiitu ya ekoore ya eraranca. Kinoona wira ti yeeyo. Keemenle vakhiviru ni yoowo, voosiisu umosa. Owo aamweetta, nto miyo kuupuwela wira aamukhala mwali oohiphwanela omukuxa, tivo miyo khuruwa. Tivo eyo kaari miyo keemenle, munna. Miyo—miyo koono wira aari mwali a Munna Shepherd, vano kaammukuxa, okhala wira koono wira khino ekaaroo awe yaarooononeya wala etthu. Hiyo naarowa, omukuxa Becky. Nto miyo—miyo koono wira khino aari mwali oohikhala. Masi vano kihoona wira owo okilaanthe vale ni yaawo, tivo miyo—miyo kookupali wira aari mwali yoowo. Tivo eyo kaari miyo kaattamenle vale vano khuruwa.

⁵¹ Tivo, atthu othene annimphenta Pwiya Yesu? Oh, voothamaleya! Eyo ti yooreera tu ni yooloka. Amen.

⁵² [Munna Neville oniira, "Munna Willard onoomalaru ovolowa."—Mol.] Ahe, Munna Willard, hiyo ninnitthapa tu okhala ni nyuwo. Ni nyuwo munooneya oreerela, nave, mpakha vanweryaaka owoonani. Oowaili nooneya ntoko ethayi yonyaaneyya, wiitho. Kooneya ntoko wira kaaroomaniwa nnikuphi na yeeyo. Ni kaahimoona Munna Willard ohiyu yoowo, okathi aarupaawe, ni vaxariya, owo ooneya vootepa. Masi munooneya vooreerela saana voosiis'ula. Ni ninnimuxukhuru ni omuttotopela Muluku mwaha wa yeeyo, munna. Amen. Ayo. Nyuwo moosuwela, xetwani khonwerya oniiva mpakha Muluku iire, "Rwaakani." Vano nintthuna orowa, kahi siiso, Munna Willard? Eyo ekeekhaii. Mpakha okathi yoowo owo oneererya mahala-ene. Ti yeeyo tu. Pwiya Yesu ti mukhaliheryo ahu ni ntthyawelo nahu.

⁵³ Vano va miyo kinlavula vanci-ene va, kirina-ene iwoora soophiyaka thanu na mosa paahi wira kilaleye voosiis'ula.

Munnona? Paahi . . . Vano, khanilaleiye, khaniveleelinhe mihupi, ni itthu, okhala wira kaahihimya wira nkaarowa okhala vaava. Masi, wira kirwe paahi kimukhaliherye Munna Neville, ni owerya owoonani-tho nyuwo othene, ni okhalana okathi vakhani wo opatthana.

⁵⁴ Nto Ettiminku evinre ohiyu, Munna Roy Roberson, nkisuwenle sinto owo ori vaava, wala nnari. Nkinwerya ohiyaniha voophiyerya wira koone sinto owo ori vaava. Owo aahikiitthana, ni aakileela mwaha wa Mutthaka.

⁵⁵ Nto mutthu mmosa khulikari, khwira, “Miyo kaamwiikoha okathi mwaalavunly’anyu mwaha wa ‘Muluku oonivaha itthu sothene.’” Munnona? Owo oonivaha. Owo oonivaha ekumi. Mweererye othuma. Owo oonivaha ophenta. Mweererye othuma. Owo oonivaha otthapa. Mweererye othuma. Owo oonivaha murettele. Mweererye othuma. Khiivo enamuna y’othuma. Khamunwerya othuma.

Vano miyo khwira, “Owo oonivaha okhwa.”

Mutthu mmosa khulikari, khwira, “Mulaleyi, kaaniikoha otthu waarowaanyu ni yeeyo.” Khwira, “Miyo kaahuupuwela, ‘Ah-oh, va Munna Branham ohiivitikanya okathi ulu.’” Kahi okathi Bibilia onihimyawe siiso. Munnona? Bibilia ohimnye wira Owo oonivaha okhwa.

⁵⁶ Vano, exeeni nikhanlyaahu wiirihaka okhwa? Moosuwela, Paulo arowaka okhwa, owo iirale, “O okhwa, mpwino anyu ori vayi?” Okhwa khonneettiherya. Hiyo nineettiherya. Khweeli. Itthu sothene noovahiwa.

⁵⁷ Vano nto kaahivaha eyooniheryo ya moota Isarayeli, arowaka muttethe wa natiri, awo yiira ahinatoko wona muttethe ole. Awo khiyaasuwela etthu ya yoowo. Awo jaarina natiri a Muluku paahi, wira waahikhala muttethe, ni waari woosareya eleethi ni oravo, ni wooreera, ni—ni nipuro nuulupale. Ni waari . . . Awo yiira ehinatoko wona. Khaavo aatonko okhala weiwo, aasuwela etthu ya yoowo. Masi awo yaahikhalana natiri a yoowo. Nto mwaha wo wamini awo yaaheetta mukwaha eviraka mothakoni.

⁵⁸ Nto vaphinye aya omukaanoni, awo jaarina nakhotto vale aaitthaniwa *Yoxuwa*, yeeyo enihimya, “Yehova Moopoli.” Vano owo aahimulapuwa Yordani, akelaka mmuttettheni wa natiri, khuruuha eyooniheryo wira muttethe owo waahikhala. Miyo okisivela eyo. Ni owo waari muttethe wooreera. Axilopwana aili yaahikuxa nivara na iwuuva. Waari muttethe wooreera, tivo owo aahiruuha eyooniheryo wira muttethe jaarowaaya okuxa waari weiwe.

⁵⁹ Vano, wa Ekereja, hiyo nineetta mmukwahani nirowaka Muttethe wa ohikhwa, Muttethe ohiri-wo okhwa, Muttethe weiwo mulipa-ookhwa onihimuxiwaawe. Ni naahikhalana Moopoli muulupale vapuwani vahu. *Yesu* enihimya “Yehova

Moopoli,” Oophentiwa. Vano Owo aahimulapuwa Yordani a okhwa, akelaka Muttetthe mukina, ni khutthika, khuruuha eyooniheryo wira hiyo ninnikhala akumi nuumala okhwa. Amen. Vano okhwa ori yayi?

⁶⁰ Vano nto Owo oonivaha itthu sothene. “Vano nookhalana neemexeryo na soohiyeriwa sahu. Mpakha . . .” Vano nwiriyane oratteene. Ni miyo nkinlaleya mwah’owo, masi enikhala yooreera wa miyo naanaano va. Munnona? Wira, hiyo nookhalana neemexeryo na yeeyo. Okhala wira, nihiku nimosa hiyo neetta mutampini; nto nuumala opatisiwa mwa Nsina Nawe, khuhihimuxiwa ni Yoowo moohihimuwani, nookumihiwa mutampini, wira nihikhalakhale-tho nitthunaka otthika. Munnona? Hiyo noohihimuwa mwa etampi, ni eyooniheryo wira nookhalana. Hiyo vooweryaneya niri moohihimuwani okhuma mokhwaani mothene. Munnona? Vaakhanle wira naamuwerya okhuma mutampini, mwaha wo omwaamini Yoowo; ni yakhala etampi, taani aarowa otthuna otthikela-tho mmucomani mwa ikokhola wa etampi? Munnona? Hiyo noovira mookhwaani khuphwanya Ekumi. Munnona? Nto nlo ti neemexeryo. Amen. Nlo neemexeryo na ohihimuwa woomalela. Okhwa wothene, mw’erutthu ni wa muroohoni, hiyo nooxintta okhwa wa muroohoni, okhala wira noovira mookhwaani khuphwanya Ekumi.

⁶¹ Ni ntoko Eliya saaronwaawe mpakha oYordani nihiku nimosa, ni khummana, ni Elisewu, nto owo khukawanyeya, nto owo khulapuwa. Owo aahitthika ni ipantte piili.

⁶² Ni okathi onimmanaahu Yordani, ni Kristu, ninkhalana epantte emosa, masi naatthikaka, ninrwa ni ipantte piili. Nookhalana Ekumi Ehinimala, ohihimuwa mwa etampi, vano, mwa exariya ni Erooho Yoowaarya. Vano nto nitthikaka, ni Kristu, nintthika ni soopiili ohihimuwa w’erutthu, ni nookhalana ohihimuwa wa muroohoni. Nookhalana ipantte piili sa yeeyo. Kweekwe ethoonyeryo ya Kristu ni Ekereja: Elisewu ni Eliya.

⁶³ Oh, nkinthuna opacerya yeeyo. Wulu, wulu, wulu, hiyo khaninrowa okelela Mutthak’ola wa iwoora thanu na mosa va. [Munna Neville oniira, “Enama mmakhuvani, nlelo.”—Mol.] Ayo. Wulu! “Enama mmakhuvani,” Munna Neville. Nlelo t’ottikittheliwa. Oh, khamutteeliwe murima? Munnona? Hiyo kharina . . .

⁶⁴ Khisaawo-tho ikhottiheryo. Okhwa kuhiyo etthu. Hiyo nookhalana. Ti wawihu. Owo khonwerya okeettiherya. Miyo kineettiherya. Sayi? Mwa Ole okikhalinhe muxintta, okhala wira miyo kooxintta okhwa. Kiirale sayi yeeyo? Mwaha wo omwaamini Yoowo. Munnona? Okhwa ori mutampini, ohaamini. Miyo nkihiyo mulipa-oohaamini. Ka mulipa-oowaamini. Koovenya mwa etthu iyo, koohihimuwa. Nlo neemexeryo na

ohihimuwa waka wothene w'erutthu, ni wa muroohoni, sothene. Ayo, mulopwana. Munniwa saana? Tivo hiyo nookhalana okhwa vathi va mweettiheryo ahu, mwa Yesu Kristu Ole oxinttale okhwa, omooroni, mahiye, eretta, muxankiho, sothene sikina, oxinttale vasulu va sothene.

⁶⁵ Ni hiyo vano noohihimuwa ni Yoowo, nikilaanthe mapuro a Wirimu, naahimyaka mwa erooho, mwa Kristu Yesu, ni itthu sothene vathi va inawu sahu. Hata ohihimuwa w'erutthu ori vathi va inawu sahu, okhala wira hiyo niri mwa Kristu. Munniwa—munniwa saana? Mwaiwaka, nvenxe matata. Amen. Ti yooreera. Mwaiwaka saana, ti yooreera. Munnona? Muhihye... Vano mukhalihye eyo mmuruni mwanyu paahi. Munnona? "Hiyo noovira mookhwaani khuphwanya Ekumi," mw'erutthu, mwa erooho, inamuna sothene.

⁶⁶ Ni sothene, ni itthu sothene, ti sawihu vano. Vano, olumwenku ota nno onihimya wira hiyo n'alolo, nave nnakhala vo elapo yothene ti yawihu. Munrowa orithi sayi yeeyo?

⁶⁷ Okathi, ntoko sihimaly'aka, Abrahamu, moone, owo aari muttethe wa natiri; Muluku aaronvaha. Lothi aaroovariwa ni amacupa ookhotta, khuroihiwa ottaiwene. Owo aari musulu awe. Vaareera. Itthu sothene saari mmuttettheni mme saari sa Abrahamu. Tivo, owo khaari nakhotto. Owo khaatonko owana ekhotto. Owo khaarina hata anakhotto ni yoowo. Owo aarina arumeyi amosa-amosa. Masi okathi woonaly'awe etthu iyo, wira xetwani, aarimoorwa khumwierya etthu aalaiheriwaawe, owo ahaathokiha arumeyi awe ni ikaruma s'ekhotto ni yoowo mwaneene khukuxa ikaruma. Owo khaasuwela moota aarowaawe oxintta mutthenkeso ola wothene wa mamwene. Nikuphi n'arumeyi paahi, masi Muluku aahimuleela moota wo wira. Owo aahiikawanya, khuwiwa mamwene, khutthika ooxintta. Mwaha wa xeeni? Owo aahelenle omwaamini wawe natiri a Muluku wira sothene mmuttettheni mmwe saari sawawe, ni Lothi aari epantte ya yeeyo, ti yeeyo, aari epantte ya muttethe. Oh, wulu!

⁶⁸ Nto vale owo aahikumana ni Melikhiseteki, vaamanly'aya ekhotto. Munoowerya omoona Abrahamu arwaaka mphironi? Owo khaasuwela wira aari nakhotto, masi khusuwela vaavo wira aari yoowo. Ayo, mulopwana. Vano owo aahikumana ni Ole aanvanhe natiri, Melikhiseteki.

⁶⁹ Vano nrowe nisome Muliivuruni mwa Amosi. Miyo kinrowa olavula voosiis'ula; kahi iwoora thanu na mosa, nnya. Kinroromela wira nnari. Munnona? Mwaha wa—mwaha mmosa, okhanle, *Mweettelo Wa Profeta Eekekhai*. Ni ohiy'ula, Apwiya yathuna vale, kinrowa olavula, *Okumiha Wuukhuwa*, ni siiso a—Apwiya yathuna vale.

⁷⁰ Vano, miyo kinsuweliwa okhala namuulumela, masi miyo—miyo—miyo nkhiyo namuulumela, etthu p'itthu ekhanle

yoovonyeya paahi. Masi miyo, hiyo, nihaana wuulumela ele yoovonyeya.

⁷¹ Vano, mwaarowaka otthukula ikaravatooro sanyu vano, musaala, vano, vaareera. Kintthuna kisome vano mwa Amosi, ekapiitulu 3. Wala e...Ayo. Ekapiitulu 3 ya Amosi, nipuro nimosa paahi na yeeyo, Amosi 3:

*Mwiwe masu ala APWIYA alavunlyaya
yoovirikanyakani, nyuwo aana a Isarayeli,
yaavirikanyaka amusi othene kaakumihalyaaka
muttetthe wa w'Ejitu, yiraka,*

*Miyo koosuwenleni nyuwo paahi eriyari ya maloko
othene a elapo ya vathi: tivo miyo kinimoohukhumuni
mwaha wa...sootakhala sanyu.*

Anneetta aili vamosa, ehiiwananaka?

*Onniipa mwatto mutakhwani, ahiphwannye
yookhuura? mwatto mukhaani onninla mukhukuni,
ahivanre etthu?*

*Onniheiwa mwaapalame mulaponi, ohireiwe
muraakho? onnikwasuwa muraakho mulaponi,
ohivanre etthu?*

*Ninnoompwa nlope mpooma, atthu kuhuova?
enookhala ehasara mmuttettheni, APWIYA ehirumme?*

*Tivo Apwiya...khaniira etthu, ehipacenrye
owooniherya isiiri saya arumeyi aya maprofeta.*

*Mwatto iipaka, taani ohinoova? Apwiya MULUKU
yaalavulaka, taani ani ehilaleye?*

⁷² Maitho awe siiso yaakhanle oophuneya, eemenle-ene voosiis'ule vantumuxani ovikana epooma ya oSamariya. Kinniweya woona matata awe oolipa ovirihaka mureruni mwawe soottweelela. Nsuwa nooviha naaryaka. Owo khaakuxa murima onweha. Moota ovirikanne awe ni anamalaleya a vano oolelo! Ikuwo sawe saari sooturuwa; ireru ntoko manri. Nto aahiweha vathi epooma ele y'oSamariya, maitho awe ekhalaka oophunyeya okathi waawehaawe. Owo khaari ookuxa murima onweha, masi owo aarina SIISO ANIHIMYA T'APWIYA wa elapo eyo.

⁷³ Yaari, khino, yoovirikana saana wa ekampaanya ela jaarwa Apwiya yaamurumenle aya oSamariya, wa ele jaarowa okhala anamalaleya ahu a vano. Owo khaarina ikaruma sa muhakalaliho owo, ntoko naarowaahu wuupuwela wira aahaana okhala olelo. Masi muupuwele, owo khaari namalaleya a vano. Owo aari profeta. Owo khaacaliwa ni ikaruma sa vano. Owo aarina SIISO ANIHIMYA T'APWIYA.

⁷⁴ Owo khaacaliwa moota sooneyaawe, ni enamuna xeeni aawaraawe, vakhala wira maihi awe yaahixamuliwa saana, wala

vakhala wira mutthu aaninweha wala nnari. Owo aarina Masu a Apwiya. Nlo naari niwoko nawe noomalela: oruha Masu ale a Apwiya. Aari pani mutth'ula? Ayo. Aari Amosi, profeta, mutthu oominyala, masi owo aanisuwela vatthu vaary'awe. Owo aanisuwela etthu iiraawe. Owo aari profeta eekeekhai a Masu. Ni etthu owo aarwenlyaawe epooma ela, waari okhala wira Masu yaahimurweela.

⁷⁵ Nto okathi Masu a Apwiya animurweelaaya murumeyi eekeekhai, owo ohaana orowa, voohicala sookhumelela, wala voohicala mikattyamiho. Owo ohaana orowa, khula enamuna. Hata okhalaka oolikana, hata aisoonaka wira, hata onootthuna, enakhaleru exeeni; owo ohaana orowa, khula enamuna. Ti Muluku onlavula, ni owo aahaana okuxa Mutthak'ola. Okhala wira, ti. . . Owo khonrowela ololo. Owo khonrowa mwaha wa musurukhu. Owo khonrowa mwaha wo osuweliwa. Owo onrowa paahi mwa Nsina n'Apwiya, mwaha w'etthu emosa. Owo ookhalana mu—muteko, ni t'oveleelihiwa n'Apwiya. Ni owo ti Masu a Muluku, okhala wira owo onkuxa Masu a Apwiya. Owo profeta eekeekhai a Apwiya.

Yoosoma aka ti: *Mweettelo Wa Profeta Eekeekhai A Muluku.*

⁷⁶ Mulopwana ola muulupale, oohoova a Muluku aahilaleerya mahiku a Yeropowamu aneili. Kookhalana epante ya wahala awe elempe va ohoolo waka. Owo aahilaleerya miyaakha soophiyaka muloko ni miraru sa ekampaanya awe. Ni Yeropowamu aari, Yeropowamu aneili, aari mmosa wa axilopwana aakhili saana ni oowerya Isarayeli aarinaawe mwa okathi munci-ene. Owo aari mulopwana aaruuhale oruwerya wIsarayeli. Isarayeli othene aamuthapuluwa. Masi, owo, yaahikhala etthu yaavonyeie ni yoowo. Owo aari namaakokhorela amuluku a ethiru.

⁷⁷ Ni kisomaka yeela vakhani, nihiku nlo, kaahuupuwela wira yaari yoolikana ni olelo. Voohicala moota xeeni mutthu ory'awe aakhili, ni moota onweryaawe wira, ni oruwerya sayi, owo amuhiya-ru Muluku, owo otakhaliwa wa elapo, oomurakamela Muluku ni Masu Awe. Miyo kinniikoha sintoko kahi yoolikana ni hiyo, olelo, wa mutthu onimusivela wiisooniherya mutelevisauni ni wooniherya moota oryaawe aakhili, osuwela kavi orinaawe. Masi kinniikoha sinto aakhalanasa voophiyerya wira ekupali SIISO ANIHIMYA T'APWIYA. Owo aari mutthu aakhili, vaareera.

⁷⁸ Isarayeli aari mmukhaleloni w'otthikela ottuli. Alaleyi awe, anamukuttho awe, ni kuveernu awe nave, othene yaahihiya Masu a Apwiya. Vano, awo khayaamini eyo. Awo yaamini wira yaari ni Masu a Apwiya. "Masi yookhala ephiro enooneya oreera wa mutthu, masi emalelo aya iphiro sa mookhwaani." Awo yeettelani voohiloka? Xeeni mutthu okhanlyaawe waaminiki wira—wira—awo yaahivonya? Onamukuttho woomalela wa

alopwana, alaleyi ikonto sene ni anamukuttho, ni mamwene ni makuvernatoooro, othene yaawo yaahimya okhala alipa-oomukokhorela Muluku, nave, nnakhala vo, othene aya yaahivonya.

⁷⁹ Ni, khaatthuneya mwene wira ekelele ohoolo. Etthu yaatthuneya aari profeta, okhala wira Masu a Apwiya, wala otaphuleliwa wa Masu a Apwiya, onimurweela profeta eekeekhai. Imaara sikina munoowerya woona moota okhanlyaaya mweettelo awe nto. Mweettelo woolipa, okathi anamukuttho othene, ni alaleyi othene, ni—ni—ni anahako othene, ni—ni kuveerunu ene aninvirikanyaaya owo. Masi, nlelo, Masu a Apwiya animurweela profeta, siiso paahi. Owo orina Masu oolikana. Onaamwi aarina Bibilia mmosaru awo yaarinaaya, masi Masu yaari wa yoowo. Muluku aamulipiherya wira owo aahikhalana Masu.

⁸⁰ Awo yaarina ipa suulupale ni iyeettiheryo sa etiini, ni sikina, awo yaatonko aya okhalana, altaari ootekiwa mapuro othene, ni—ni inamuna sothene sa—sa itthu, masi nnakhala vo awo yaari ikilomo imilyawu sene wa Masu a Muluku.

⁸¹ Miyo kookupali, mmansaka, elatarato eyo yaamulikana saana olelo, ntoko kisomalyaaka Eliivuru ila ya Amosi. Muhaana osoma mwarowa owaani. Kuveerunu othene, anamukuttho, othene aya yaahihya Masu a Muluku.

⁸² Kaatthuna paahi kisome nipuro nikina na Yoolempwa va, kirinaaka, wira kooniherye nipuro yiiralyaya. Vano nrowe nisome kapiitulu 2 versiikulu 4, minuutu mmosa paahi.

Siiso anihimya t'APWIYA; Mwaha wa sootheka tthaarua sa Yuta, ni yaneeexexe, miyo nkinikumihya ehukhumu; okhala wira awo aakhootta ikano s'APWIYA, . . .

⁸³ Awo ti Masu, aathanya Yaawo, nave nnakhala vo awo yuupuwela wira yaahikhalana Yaawo.

. . . ni khayiwwelenle sooruma saka, ni wootha waya ohaavonyiha, . . .

⁸⁴ Vano, awo yaahikhalana Masu, Bibilia, masi wootha awo yaatakaihanne aya ni Yaawo waahaavonyiha.

. . . numala . . . yaawo axitiithi aya yeettalyaya:

⁸⁵ Munnoona mwaha ene? Vano, awo yaahivonya okhala wira awo yaarooohela orukunxa waya mmansaya ahiiso otaphulela Masu. Ni kuupuwela wira yaari yoolikana ni olelo, okhala wira anci-ene antthuna aheleke akhili aya mwa Masu, nto nniphivorya otepanyeya. Opwapwela xeeni wa Muluku, profeta ola aarinaawe.

⁸⁶ Vano, Amosi aari profeta a Muluku, profeta eekeekhai. Khula mutthu otonko osoma sa Amosi onnisuwela ominyala wa mulopwana ole oohoova a Muluku. Onitthokeleliwa ntoko mmosa wa maprofa akhaani, okhala wira khaakhanle okathi

munci-ene, masi owo vekeekhai aahihela epaso vamutathaarini va mwiri. Owo aari mmosa wa maprofeta ootepaxa ohoova, ni aarwiiye ni muttikithelo. Owo aarwiiye ni SIISO ANIHIMYA T'APWIYA. Owo aanisuwela etthu aahimy'awe, okhala wira muttikithelo wa Muluku waari mwa yoowo wira aaruuhele otaphuleliwa woolikana wa Masu a Muluku.

⁸⁷ Amosi aakhumme okuluttuni, mothakoni, arowaka epooma yookuxa murima. Owo iira ahinatoko okhala weiwo khalayi. Owo aari mmiravo a okuluttuni, ottaiwene wu mothakoni. Okathi owo aaryaawe weiwo avekelaka, Muluku aahikumana ni yoowo, ni khimuleela otakhala wa elapo ela yookuxa murima owo aaryaawe epantte ya yeeyo. Ni Samariya yaari epooma yuulupale, emosa wa ipooma suulupale s'okathi, ni sa omwene wa Yeropowamu.

⁸⁸ Nto okathi owo eemenly'awe vale voosiis'ule, vasulu va ntumuxa, arwaaka ni ikuwo sawe, sa khalayi, soowalakakha, sa okuluttuni, khino ntthupi ni marove munawoni mwawe, ni vaavo owo aarumpe-awe vanttapwattani nle na khalayi, ohiyu p'uhiyu. Ni nkisuwene, owo khaarina mapuro oorapa-mo mahiku ale. Khino waari mahiku vakhani vaamanlyawe orapa. Masi eyo khennanariha muhina mwa mutthu. Olelo, vanci-ene, oncalaxiwa ota, ni voohiphiyerya muhina. Hiyo nincalaxiwa vakhala wira ninnirapa khula nihiku, ni sintoko maihi ahu aaxamuliwa, ni ikuwo sahu soopatiliwa, ni sothene, vano nto ninoohiya muhina okhala khula enamuna, owara ikuwo imosaru sa etampi, ninkhihaka munepa ni iyaaminelo ni makano, nave khaninthokosa ni orapiha Mmasuni a maasi oovalaaniha, itthu sa molumwenkuni.

⁸⁹ Okathi weemenlyawe voosiisu ule, awehaka oryeene vantumuxani, epooma ele yookuxa murima, yoosareya itthu sa vano owo ahaatonko awe oloha wira yaahikhala etthu ene yeeyo. Isarayeli aari nipuro nawe na vasulu. Waari moovarihanani ni ilapo sothene sowaattamana. Yookuxa murima saana, athiyana oowara oratta-ene, ni a—ni alopwana. Ni yaari oovariwa ni soopuha, etthimakaka ekwiriita, ni amusewe olimpiku, ni sothene siiraneyaka. Khivanxankiha maitho awe yaaphunyeiye aya; kahi ni okuxa murima wa epooma, ntoko maturista yaarowaaya wira, aphiyaka oNova Yorke, wala oLos Angeles, awoonaka athiyana oowara nuusu, alopwana yiiraka itthu siiso, ni etampi.

⁹⁰ Apatthani aka amosa-amosa, mahiku vakhani avinre, yaakhuma mukwaha wo omiserya, ohoole vakhani wa ekoleexiyu ya Bibilia, ekoleexiyu emosa yuulupale ya Bibilia yoosuveliwa. Nto vale, yimmaathale-ene yuulupale ya yuulupale ya Bibilia, yaari aximwali, oowara nuusu, ni aximiravo, alakela asomi a okoleexiyu, awuryasaka ni yiirasaka itthu, vooanara.

⁹¹ Vano, mweettelo ntoko owo onnitannya ikhwilyu sa atthu a

wAmerika aniisiitthana aKristu. Yaawehaka oLos Angeles, ahiiso miyo kihaaweha mmuttekeni nihalelaka ophiya oLos Angeles; yiira ahinatoko okhala weiwe khalayi; wala oHollywood, wala—wala oFlorida ni mithuko saya sothene sa neyoni mmi—mmirini sa makutthi. Oh, awo anooviriha—tho otthu vaphulani vaya, ni olakiherya soowiisoottiha saya. Awo yaari. . .yuupuwela wira yaari etthu yookuxaxa murima yaatonko aya woona. Ni owoona othene ooxamula saana ni owara, yeettaka mphironi, awo yaatthuna okhuma vale yawoone otita xeeni yaakhanle aya owaraka ikuwo saya, wala wiittikinya osulu ni vathi mphironi. Okathi, awo anuupuwela wira ele etthu yooreeraxa.

⁹² Masi maitho ale a Muluku oottikittheliwa a profeta ole khayaaphunyeya mwaha wo okuxa murima, ntoko maturista, masi mwaha wo ohononeya wa elakeyelo, wa atthu yiitthaniwa okhala ooreerhiwa a Muluku. Maitho awe khiyaawehale okuxa murima. Awo khayaaphunyeya mwaha wo okuxa murima. Waari mwaha wa o—o—ohureya ni ohononeya wa atthu yaaitthaniwe wira ekhale oothaniwa a Muluku, nave khunaira enamuna emosa ntoko eyo. Kivanxankiha, owo ohimalyawe wira, “Mwatto onniipa, taani ohinoova? Muluku aalavulaka, taani ani ehilaleye?”

⁹³ Owo aarimoona opahuwa, emorelo. Ti yeeyo owo aawehaawe. Owo p’ukathi owo oonalyaawe sothene iyo. Eyo khiyaamuvara murima owo. Eyo yaahimuhaaxa munepa. Mwaha wa xeeni? Owo aari profeta. Owo aanisuwela etthu Muluku aalaiheryawe wira aamureeriha, ni eparakha xeeni yaari iyo, ni moota atthu aniiseettihaaya ni eparakha. Nto xetwani aahihonona mwa nihiku nawe, wa ele yaari eparakha y’eekeekhai, khukhala e—e—emorelo ya olakeya; eparakha wira ettettekheke maitho ni osiveliwa wa atthu oohirukunxa murima, wa otthuna ni enamuna ya Muluku, ni enamuna ya ekumi ya Muluku.

⁹⁴ Moota enlikanaaya ni olelo! Moota alaleyi anweryaaya weemela vapulpitu, n’uweha etampi ni ohononeya wa olumwenku ula, ni owoona atthu yiiraka ni yiiseettihaka enamuna siniiraaya, vano nto waareeriha paahi okhala wira mumpuru a ekereja aya, wala muromolelo, ti yoovikana ele munepa aka onweryaaya osuwela saana.

⁹⁵ Muluku aalavulaka, olaleerya! Erooho ya Muluku yamphwanya profeta eekeekhai a Muluku, owo onookhuwelela ni Masu. Miyo nkinthuna okhala namuulumela, masi taani okhanle omaalaka? Taani okhanle ovilelaka oweha etthu iyo, ni ohimya okhala murumeyi a Kristu, nave khuhinahimya? Miyo nkincala ele muromolelo waarowaaya ohimya, wala etthu khula ekereja jaarowaaya ohimya; mwaha wa yeeyo miyo kihiniirelaaka mpante wa seiyo. Awo yaamuwoomolani, opacerya wene. Masi Masu a Muluku anrwa voopacerya.

Nyuwo mwakhala namitthaka, muhaana etthu yo ohimya. Mwaahimiyaka etthu yoovirikana ni Masu ala, khamuhiyo namitthaka a Muluku; nyuwo mwa namitthaka a waataana wa muromolelo wala muupuwelelo khata. Masi namitthaka a Muluku ookhalana Masu a Muluku.

⁹⁶ Nto mpatthani ahu, voosiis'ula, ntoko sinwehalyahu, owo aarina Masu a Muluku, okhala wira owo aari profeta eekeekhai a Apwiya.

⁹⁷ Vano, awo yuupuwela wira yaahikhalana o—otaphuleliwa waya, nto khuupuwela, “Ahe, vekeekhai, nkawehani etthu eniiraahu.”

⁹⁸ Vano, etthu ene t'ila, wira nookhalana owo eemenleene vale vasulu va ntumuxa voosiis'ula, owehaka vathi, epooma yothene. Attikinyaka muru awe, awehaka; maitho awe ephunyeyaka. Akuxaka moonu wa ekamisa awe uukutthaka oviheriwa wiitho wawe, ni ntthupi. Nsuwa nooviha naaryelaka muru awe wa ntari. Ireru sawe simorelaka vathi; owo ottikitthaka ni matat'awe. Owo khoonale okarya. Owo oonale etampi. Eyo khiyaamusivelinhe owo. Eyo yaaninwereiha murima.

⁹⁹ Xeeni owo ahaarowaawe wira, “Miyo, mwIsarayeli, nkawehani moota elapo aka ekelenlyaya ohoolo”? Vaaweryaneya sayi owo ohimya eyo oryeene profeta eekeekhai a Muluku, asuwelaka sookhumela, ni ele yaarowa okhala emalelo ya etthu ntoko eyo?

¹⁰⁰ Nrowe nimuhele vantumuxani olelo ni awehe vathi va. Owo awehe oJeffersonville, atthu aniisiihana aKristu. Awehe khula nipuro wAmerika w'atthu aniisiihana aKristu. Maitho awe oottikittheliwa a Muluku yaamphunyeya—tho. Avirihaka matata awe veereruni vawe. Mwaha wa xeeni? Owo khonoona ovara murima ni okelela ohoolo olumwenku onoonaaya. Owo onoona o—orakameliwa Muluku. Owo onoona omala olakeya w'atthu. Owo onoona otthikela ottuli wa elapo. Owo onoona wuntta mukereja. Aakhanle wiiraka exeeni—tho woohikhala ophunya maitho awe, ni otthuna okela mwa yeeyo, wira akherakase kapatti-kapatti?

¹⁰¹ Ankhi pixipu mmosa aakumanne ni yoowo osulu iwe, ni khwira, “Vano, nyuwo mwa profeta a Apwiya? Vano, hiyo nnimooleelani etthu mukhanlyanyu ohimiyaka ni etthu muhikhanlyanyu ohimiyaka”? Nyuwo munoonu wira owo aamwiiwelela? Ankhi awo yiirale, “Murwe mwiitakanihe mutthenkeso ahu naanaano va, nto hiyo nnimookhaliheryani mukampaanyani mwanyu”? Nyuwo munuupuwela wira owo aamwiiwelela? Nnari. Miyo nkaawerya otthokelela eyo, wa mutthu ntoko owo. Nnari.

¹⁰² Owo aaveleelihiwe ni Muluku. Owo khaatthuna mukhaliheryo aya. Owo aarina Masu a Muluku, muttikitthelo wa Muluku, okathi woothanliwa ni Muluku. Owo aarwa mwa

SIISO ANIHIMYA T'APWIYA. Uh-huh. Owo profeta eekeekhai. Eyo p'inamuna owo oneettaawe. Owo oneetta paahi ni SIISO ANIHIMYA T'APWIYA.

¹⁰³ Epooma ela yookuxa murima ya oSamariya, Isarayeli ula, a enamuna awe oosoma saana, alaleyi ala ni anamukuttho oolakiwa oratteene, yaammwaakhela mutthu ula mwaamukhaani, oohisuweliwa? Alakela elavulelo awe yaari yootepa ohilikana. Aakhumme emusi yoohaawa mothakoni. Aakhumme owaani, oowitthaniwa ni Muluku, khurowa mothakoni wira amusome Muluku ni Masu Awe, nto khukhala profeta. Apwiya yaamwiirihale oyariwa siiso.

¹⁰⁴ Maprofeta aniyariwa, namitthaka a okathi, yaawo Muluku, mwaha wo osuwela khalayi ene, onsuwelaawe okathi ni onkhalanaawe mutthu Awe vale wira apwapwele etampi.

¹⁰⁵ Epooma ele yookuxa murima yaamuwerya omwaakhela? Munuupuwela wira athiyana ale yaamucaliwa ni etthu owo aahimyaawe? Nyuwo munuupuwela wira anamukuttho ale yaamunwiryana? Vano, nnari, mulopwana. Owo khaarina hata miruku, sa hata mutthenkeso. Owo khaakhanle ohimyaka, wira, "aFarisi arookiruma." Ni nnakhala khaakhanle ohimyaka wira aSatukhi aroomuruma. Owo khaarina hata ipaphelo sa onamuhupi. Owo khaarina hata ettikitti ya opatthana ya hata nikhuru n'atthu. Owo khaarina mahoolela wira atthokihe ekampaanya awe. Khivaari wira aFarisi othene yaahikhalana muthukumano wo wiiraana ni o—ni olya wa voosiisu wa orumeyi, ni otthokiha sothene, wira atthokihe ekampaanya awe, ni asuwelaka wira owo aamoowa. Owo aari oohisuweliwa wa awo. Owo khaarina hata ettikitti ya opatthana. Owo khaarina hata ipaphelo sa onamuhupi. Owo khaarina hata miruku s'atthu.

¹⁰⁶ Masi owo aarina SIISO ANIHIMYA T'APWIYA. Eyo t'inamuna ya profeta eekeekhai. Owo aarina SIISO ANIHIMYA T'APWIYA. Vakhala wira owo aarina SIISO ANIHIMYA T'APWIYA, ti yoovirikana saana ni ilavilavi sahu soopakiwa n'atthu va. Ti yeeyo tu aathunaawe. Vaakhanle wira owo aarwiiye enamuna *ela*, owo onrwa mwa nsina na ekereja. Owo arwa enamuna *ela*, owo onrwa mwa Nsina n'Apwiya. Vano, profeta eekeekhai okathi wothene onoorwa enamuna ya Nsina n'Apwiya. Okathi wothene, owo onoorwa mwa Nsina n'Apwiya.

¹⁰⁷ Vano, owo khaawerya wooniherya ittikitti sa opatthana, masi owo—owo aahikhalana Masu a Muluku. Ni ti yeeyo Muluku aaveleelihenry'awe atthu. Vano, atthu yaaipakenle mitthenkeso. Awo yaarina makhuru oohiyana-hiyana a sootthara, ni ti yeeyo atthu yaapakalyaya. Masi Amosi khaarina eyo. Owo aarina paahi SIISO ANIHIMYA T'APWIYA. Ti yeeyo owo aarinaawe.

¹⁰⁸ Kinnaatthokelela anamukuttho ale, voosiisu, yaahikhalana vakhani saapatu voosiisu, okhalana nivekelo naamukhaani, siiso, miteko sikhaani s'ovahererya, ni—ni otthika. Ni

yaahilavula itthu vakhani sa Moise muulupale, aakhanle nihiku nlo, ni mutthu mukina muulupale aatonko okhala nihiku nlo. “Masi, oh, mahiku a yeeyo aavira vano. Nyuwo atthu munnimusuwela mukhulupale ahu a naanaano, kuveerunu ahu a naanaano ni sothene hiyo sirinaahu,” ni olavula itthu vakhani siiso n’urowa owaani.

¹⁰⁹ Masi va onoorwa mulopwana mmosa ohincaliwa ni yeeyo. Owo aarwiiye ni SIISO ANIHIMYA T’APWIYA. Munnona? Owo ti mweettelo wa profeta. Oohikhaliheriwa, aasuwela etthu yaamurweela, aasuwela wira sothene saarowa onvirikanya, aasuwela wira awo yaammukhootta, khiyaarowa omwaakhela. Masi owo aarwa mwa Nsina n’Apwiya.

¹¹⁰ Yesu aanisuwela wira Kalvario aari ohoolo Wawe, masi Owo aarwiiye mwa Nsina n’Apwiya. Munnona? Owo ti mweettelo wa profeta eekeekhai.

¹¹¹ Owo aarina Masu a Apwiya wa elapo. Masi Masu eekeekhai a Apwiya yaari oohisuwanyeya w’atthu ale. Nnakhala vo, awo yuupuwela wira yaahikhalana Yaawo. Kinwehererya wira ela enookela voowiixerya. Awo yona wira yaari oothunku ni anatiini, mpakha Masu eekeekhai a Muluku yaari etthu yoohisuwanyeya wa awo.

¹¹² Ti siiso ery’aya olelo. Masu eekeekhai a Muluku owooniheriwa etthu yoohisuwanyeya w’atthu anci-ene aPentekosite. Otaphuleliwa w’eekeekhai wa Masu, otakhaliwa w’eekeekhai, ni itakhaleliwo, iparakha s’eekeekhai sa Muluku etthu yoohisuwanyeya wa atthu anci-ene aniisiihana a osantu, mamempuru a mukereja, aKristu. Eyo etthu yoohisuwanyeya wa awo. Awo khansuwela. Mwaalavulele Yeeyo. “Khanatoko wiiwa etthu ene eyo.” Nto, nlelo, mitthenkeso saya sinninnuwa ni okelela ohoolo, sikhhalaka sowunnuwexa mwa mamempuru okathi wothene, ni mitthenkeso sinci-ene sinaacereriwa khula mwaakha.

¹¹³ Awo yuupuwela wira etthu p’itthu jaarwa wa yaawo yaahaana okhuma makhuru ale a sootthara. Vekeekhai awo khiyaarowa omwaakhela. Nnakhala olelo khiyaarowa wira. Awo yaahiliyala khalayi, wira, “Muluku aamuwerya ni maluku ala otatuxa khukhala maprofeta eekeekhai a Muluku.” Muluku onniwerya, ni namphaca ikhuni. Owo onniwerya waavenxa, ni maluku ala, atthu anrowa weemererya Masu Awe, ni olaleerya mwa Nsina Nawe, Ekeekhai. “Ohelaka epaso vamutathaarini va mwiri.” Ohiya mapapatthu omora. Voohicala sinto ookhalana mukhaliheryo wala ohikhalana mukhaliheryo. Masi eyo ti enamuna ya profeta eekeekhai.

¹¹⁴ Atthu akina anuupuwela wira owo orina vookhweya. Awo khansuwela etthu anihimyaya. Owo khoruuhiwe mpooma ni ekaaro, akilaanthe vasulu va ikhavalu, ni iphapo soophwanelihiwa, ni sooreera, ni akhulupale a

anamukuttho yeemenle vale, ni itthu suulupale mmuruni mwaya, emuuramelaka, “Totori *Lexe ni lexe* oottittimiheya onnoorwa.” Eyo yaamukhala ethhokiheryo ya mutthenkeso khata.

115 Ntoko Mwene a awo othene aarwiiye, Owo aarwiiye, ntoko, munikhomani, munikhomani mwa imompe. Khaarwiiye voowunnuwa ni ovuwa, masi Owo aarwiiye mwa wiiyeviha wa Mwaana ooyariwa munikhomani. Amosi khaarwiiye. . . Masu a Apwiya; okhala wira owo *aari* Masu a Apwiya. Khula Masu a Muluku, kahi mutthu; ti Muluku.

Yesu iirale, “Nkihiyo Miyo kinvara miteko.”

Awo khwira, “Nyuwo mwa Mutthu, muniikhaliha Muluku.”

116 Owo khwira, “Vano kaahivareke miteko sa Muluku, muhikaaminiki. Masi vakhala wira miteko sinnilavula mmansaya, mwaamini miteko, mwaahitthuneke okaamini Miyo.”

117 Amosi aari Masu a Muluku yeettaka mphironi. Owo aarwiiye, voolipa-vo murima, kahi mwa mihapo sa molumwenkuni. Owo aarwiiye mwa owerya wa Erooho.

118 Ti siiso Masu a Muluku anrwaaya. Kahi mwa eyaaminelo ya mutthenkeso, kahi mwa etthu yookenyeya vapulpitu; masi Awo anrwa mwa owerya wa Erooho, wira emusuwelihe Muluku mulaponi ni w’atthu. Eyo t’evirikanelo. Moota evirikanne-aya!

119 Vano, yaahisuwela, okathi munci-ene khalayi, wira Muluku onniwerya ni maluku waavenxa maprofa eekeekhai. Awo khayaarina. . . Mutthenkeso aya khuwaarina onvenxaka profeta eekeekhai, okhala wira khino khiwaawerya wira. Okhala wira, vaari siiso, aarowa okhala profeta a mutthenkeso.

120 Masi, Muluku onninvenxa! Muluku onthanla ele Owo onthunaawe. Owo onikuxa yoohikhala etthu, voolimaleleya, wira avare muteko Awe; enooniherya wira Owo Mulukuu. Mutthu aihelana, khunoono wira owo etthu, vano Muluku khokhanle omurumeelaka, okhala wira mmwe khereere ya yoowo mmansawe.

121 Ti yeeyo eniireya ni ekereja y’eKristu olelo. Awo anuupuwela wira annisuwela etthu. Bibilia onihimya wira, “Mutthu uupuwelaka wira onnisuwela etthu, owo khonsuwela etthu yaatthuneya wira osuwele.” Mulattu ene olelo, khinireerane omiyo, enamirima miili yinci-ene, osomaxa, etiini yoowaatta, ni ohisuwela hat’etthu ya woopola wa Masu a Muluku. Eyo ti epante yookhupanyereya ya yeeyo. Ayo.

122 Awo yaahiliyala, wira, “Muluku aaniwerya ni maluku ala waavenxa aana a Abrahamu, wala waavenxa maprofa eekeekhai a Masu.”

123 Awo kharina yo okhuma oxikola khata. Muluku onnaavaha osoma waya. Awo kharina okhalanaka ikharawu xexe sa

okoleexiyu. Awo kharina yo okhalana Ekharawu aya ya Erattelo, ni—ni Ekharawu ya Totori, ni sikina. Awo kharina yo okhalanaka eyo. Muluku onkuxa khula etthu Owo ontthunaawe, ni ohela—mo Masu Awe mwa yeeyo. Owo oniira sayi? Owo onimooniherya ni onnilipiherya Yaawo.

¹²⁴ Awo khiyaawerya ohimya eseminaariyu Yesu aakhumaawewo. Owo khaarina hata emosa. “Exikola xeeni Owo onikhumaawe—wo?” Owo khaarina hata emosa. Masi Owo aarina exeeni? Owo aarina Muluku, ni Owo aari Masu. Awo khiyaawerya omuthoonerya hata exikola.

¹²⁵ Ni Muluku khonanvenxeke mutthu a exikola. Mphavelase moovirani wa okathi nwehe okathi xeeni Owo otonko awe wira. Owo khoniira. Owo onkuxa etthu nipuro nikina, ehirina etthu, hata nrromelo wa yeeyo. Vano Owo onooruua yeeyo ni ohela Masu Awe mwemmo, ni wiisooniherya Mmansawe. Ti yeeyo Owo iiraawe va mwa Amosi. Vaareera.

¹²⁶ Vano, Masu a Amosi yaahilipiheriwa ni Muluku, nihiku, mahiku aya yaawo. Olip-...Muluku aahilipiherya Masu a Amosi okhala yaawo, wira owo aari, aahikhalana Masu a Apwiya.

¹²⁷ Nto vaakhanle wira owo aamunirweela, naanaano va, munuupuwela wira elapo ahu ni atthu ahu yaammwaakhela mutthu siiso? [Muthukumano oniira, “Nnari.”—Mol.] Nyuwo munuupuwela wira aPatista yaammwaakhela Amosi? [“Nnari.”] Metotista? [“Nnari.”] Aprespiteriyaano? [“Nnari.”] Apentekosite? [“Nnari.”] aKatolika? [“Nnari.”] Nnari, mulopwana. Nnari. Vekeekhai khaakheliwa.

¹²⁸ Nrowe, okathi vakhani paahi, nimukuxe nimuruuhe va, okathi vakhani paahi, noone khama yaammwaakhela wala nnari. Nrowe noone khama owo aamu...khama ikereja sahu saammwaakhela olelo wala nnari.

¹²⁹ Etthu yoopacerya aarowaawe wira, owo aarowa ovaanyihama ni khula mutthenkeso, okhala wira ti soovirikana ni Masu. Um—hum, uh—huh, ayo, mulopwana. Owo aampwapwela sothene sikhalinhe ahu. Ti yeeyo. Khula mwixuttiho, khula eyaaminelo, khula muromolelo, owo aampwapwela etthu yothene.

Kinootthokelela paahi, kinniwerya owoona akina wa ahumu ala apentekosite yiraka, “Vano, avuwihawe Muluku! Vakhala wira owo...Vano, hiyo khinaarowa okhalana mulopwan’ole mpooma mwahu.”

¹³⁰ Nto nyuwo munuupuwela wira aPrespiteriyaano ni aPatista yaamwiira? “Vano, oohisuwela etthu owo, hiyo kxanimmutthuna mulaponi mwahu. Owo kahiyo etthu woohikhala o—oowaraala.” Awo yaamulepa epaphelo wira emuhele mukalapooso, vaakhanle wira yaamuwerya, wira emukumihe mphironi.

¹³¹ Masi munoono wira mwaamuwerya omukhaliha owo vaavo? Oh, nnari. Khamunwerya otthukwela Masu a Muluku. Nnari, nnari. Awo anookhuma, khula enamuna. Iwalelo sa mukalapooso saahihuleya ohiyu umosa, okathi yeerenryaaya otthukwela. Waarya waahikela khimutaphula.

¹³² Nnari, owo—owo vekeekhai owo aamurowa ovaanyihana ni iye sikhalinhe ahu. Vaareera. Exeeni aarowaawe opacerya wira? Opwexakasa. Mwaha wa xeeni? Owo murumeyi a Muluku. Owo aamurowa olukama Mulipiheryo ene apacerye ekampaanya awe, ovenya wene, ni okumiha khula eyaaminelo, ni otthikela Vamulipiheryoni. Exeeni ekhanle Mulipiheryo? Mwa Masu a Muluku. Ekeekhai. “Erimu n’ilapo ya vathi sinoovira, masi Masu Aka khanvira.” Tivo owo aamukumiha vale khula muromolelo, khula eyaaminelo, khula mwixuttiho, mwa yeeyo, arihele ota, ni aanvaviha mpakha wa Ehimalelo.

¹³³ Munuupuwela wira aPentekosite yaammwaakhela? Nnari, mulopwana. aPatista? Aprespiteriyaano? Nnari, mulopwana. Anasareno? Anawetta a Osantu? Awo yaamurowa omunyokha. Vekeekhai. Munuupuwela wira awo yaamukhuma yakumane ni yoowo mu—mulimosiinini, emuruuhe mpooma? Awo yaamulompa wira nsuwa nimureve. Awo yaamuhela ettiyelelo, wira emukhottihe okela mpooma. Vano, saamukhalaxa mithukumano sa orumeyi, mpooma, muhinatoko anyu woona mookhalaru. “Nanwaraala owo akhalihwe ota wa epooma ela.”

¹³⁴ Masi, nnakhala vo, owo aarina SIISO ANIHIMYA T’APWIYA. Munnona? Eyo t’inamuna ya profeta eekeekhai. Owo aamuthanyiwa. Vekeekhai. Owo aamurowa mpakha Vamulipiheryoni, ni ekampaanya awe. Owo khaarowa otthuna. Owo khaarowa wira, “Vano, kintthuna wira nyuwo aMetotista othene murwe naanaano va mukikhaliherye. Miyo kintthuna nyuwo aPatista. Kinootthunani nyuwo othene athu mmuttettheni mu. Nyuwo aPentekosite othene, nyuwo munihimya wira mwa nikhuru nookiserya Muluku onrowaawe wiitthana, Kintthuna wira nyuwo othene murwe wa miyo, ni kintthuna wira mukhaliherye ekampaanya aka.”

¹³⁵ “Mumpatisa sayi? Tiivi ekhanle eyooniheryo yoopacerya ya Erooho Yoowaarya?” Sookoha iyo, aamukumanana seiyo. Nto okathi aarowaawe waakhula ni Ekeekhai ya Bibilia, awo yaamurowa omukhootta. Masi owo ti mweettelo wa profeta eekeekhai. Owo ohaana okumana ni sothene iyo. Munnona? Vekeekhai.

¹³⁶ Hiyo khanaarowa omwaakhela. Nnari, mulopwana. Yawihu—yawihu. . . Khinaarowa okhalana hata emosa. Hiyo khinaarowa okhalana hata emosa wa ikampaanya sawe mwawihu—mulaponi mwahu. Nnari, nnakhala. Ahe, hiyo khinaarowa okhalana. Nnari, mulopwana. Masi owo aamurowa orwa ni aamuttkiherya Ekereja Mmasuni, okhala wira Owo ti

Mulipiheryo. “Khula mutthu onihela mulipiheryo mukina, iyo mithaaka sinkomowa. Vasulu va mulipiheryo *ola* paahi, Muluku onteka Ekereja Awe, vasulu va Mwiiixuttiho w’arummwa.”

¹³⁷ Ntoko saahimyaaka nihiku nlo; mutthu mmosa alavulaka mwaha wa—wa epurkatooriyu, ni waahimya anci-ene ntoko Fransisko Oowaarya ni Cecilia Oowaarya, ni wira owo aavekelela atthu amosa-amosa, wira aakumihe opurkatooriyu, ni waavaha okhulupale ntoko owo. Owo okhulupale woohilempwa. Awo atthu ahirina okhulupale. Arummwa yaahikhalana okhulupale wa Yoolempwa. Ni yakhala yoovirikana n’awo, ti yoowoothiwa, vanikaasa miyo.

¹³⁸ Miyo kinnaamini epurkatooriyu, masi kinnaamini wira ti naanaano va. Nyuwo munreeriha munepa anyu. *Epurkatooriyu* enihimya “oreeriha.” Moona wira muhiira etthu yoonanara, murowe mwaikukutthe yeeyo, mulapaka, ni munlaka, ni otthuka, ni ovekela.

¹³⁹ Ookhala aakitheiye okathi Apwiya yaaruuly’aya nno woohikhala khalayi khukivaha yoowoona. Miyo kweekwe kaanithuna woona sa otthukwa enowa. Kweekwe kaaniikohaka sayi. Moota woophiyerya nivalo siiso. Okathi, ti yeeyo miyo kaatthunaaka, ekumi aka yothene. Vano kipacerya otthuka ni ovekela. Khwira, “Mwiirenle-ni yeeyo?”

¹⁴⁰ Miyo khwira, “Mme, Owo ohimnye wira nkaari naxariya voophiyerya.” Nuumala Owo orwa, vano miyo kaatthuna wiireeriha mmansaka. Kahi olipelela mpakha nyuwo okhwa, ni omuhiya namukuttho wooreerihani. Oreeriha minepa sanyu!

¹⁴¹ Masi, moone, awo akuminhe Mmasuni akhanle okhulupale, khuhela mmatatani mwa makano kamosa-kamosa oopakiwa ni mutthu, wira eruuheke musurukhu mukereja, okhala wira awo anweha itthu sa molumwenkuni, ekereja ya molumwenkuni, owerya wuulupale molumwenkuni, owerya wa ipoliitika. Masi Muluku onweha Masu Awe. Ni khula nuulumo nikhanle noovirikana ni Masu a Muluku ti noovonyeya. Vanikaasa miyo, ti Masu wala hat’etthu. Ayo, mulopwana. Ayo, mulopwana.

¹⁴² Owo aamurowa olukama Mulipiheryo. Owo aamukhera etthu iyo kapatti-kapatti. Owo aahaana wira. Owo khaakhanle wiiraka etthu ekina, vaakhanle wira Amosi aari vaava olelo. Owo khaakhanle wiiraka etthu ekina, maana, muupuwele, owo profeta eekeekhai a Muluku, yoowo animurweela Masu. Owo khaakhanle wiiraka etthu ekina woohikhala otthikela Masu. Voohicala khama aPentekosite othene mmuttettheni yaamuthukumana emurukurenrye, yiire, “Mulopwana, Amosi, hiyo ninnaamini wira nyuwo mwa profeta, masi moohiya Masu. Hiyo ninthuna noolakiheryeni.” Owo aamukhala ni Masu. Khiyaavo etthu ekina owo aakhanlyawe wiiraka, okhala wira owo profeta. Owo khaaphavela mukhaliheryo aya. Owo orina Mutthaka wira avahe. “Ni Othene ale Atithi akivanhe aya

animoorwa wa Miyo.” Ni owo onrowa olaleya Masu, nto owo onrowa olaleya Yaawo siiso ntoko aryaaya mBibiliani, nto tivo naamurowa omukhootta. Ti yeeyo.

143 Hata wira Awo yaarowa okhala exeeni, Masu a Muluku anaarweela maprofeta, otaphulela waya wa Masu, otaphuleliwa woolikana.

144 Isarayeli okathi wothene aanikhuma mwa yooloka, nto Muluku aaveleeliherya profeta ni ithoonyeryo ni mitikiniho, wira ataphulele Masu awo. Nto owo aasuwenle sayi? Owo iirale, “Profeta ola alavularu, vano khwiiraneya, vano ti yoolikana.” Owo aanaalipiherya maprofeta Awe, wira awo yaahikhalana exariya.

145 Yesu ohimye wira, “Ole onikaamini Miyo, miteko sinvaraaka nave-tho owo onoovara. Ela nyuwo munoosuwela. Ithoonyeryo iya sinimwaatthara ale anrowa waamini.”

146 Ni anwerya sayi awo ohimya wira profeta a Apwiya ni okhootta Masu yaawo a Muluku? Onwerya sayi mutthu opatisa ni nsina “n’Atithi, Mwaana, ni Erooho Yoowaarya,” itiitulu iyo, ni okhootta Nsina nenlo na Yesu Kristu, ehikhanle hata Yoolempwa mBibiliani wira ekhaliherye muupuwelo aya? Khino miyo k’olipa murima ni oowuulumela, masi okathi wo okhala siiso. Eyo Ekeekhai.

147 Vanweryaneya sayi atthu wiisihana okhala aKristu olelo, ni otthimakela itthu sothene iya, ni athiyana ni maihi oometthiwa, ni yaawaraka akaputtula, ni waavura asikaro, ni atthimakelaka musineemani, khula enamuna ya ithekulelo, ni wira itthu sohiloka? Okileela wira eyo Erooho Yoowaarya? Muhikhalakhale mukileelaka yeeyo. Nyuwo, munninwereiha Muluku mmirimani, yaakhanle etthu iyo yiiriwaka. Ayo. Kookupali wira munniiwa saana. Mwiisihanaka, etthu ntoko eyo, vanweryaneya sayi okhala etthu ene yeeyo? “Ni mihokorokho saya annisuweliwa.”

148 Owo aammuulumela ni ompwapwela khula muthiyana oomettha maihi. Aakhanle wiiraka sayi etthu ekina? Owo profetaa. Ni awo Masu. Owo aamwiira, “Nyuwo, maYesapeli!” Owo aamwaaleela oratteene. Mwaha wa xeeni? Owo profetaa. Owo aahaana okhala ni Masu. Ti yeeyo. Nyuwo munuupuwela wira awo yaamuhiya? Nnari, mulopwana. Awo yaamwiira, “Owo namathipelela. Owo t’otakhala murima ntoko Paulo ole, mBibiliani, mulipa-oowaanyokha athiyana.”

149 “Nyuwo, nikhuru na anamawoka, aniiithaniwa aKristu. Voohicala moota xeeni mumphavelaanyu okhala vooreera murima, eyo kherina naata n’iyo. Mwaakhoottaka-ru Masu a Muluku ni ohiilakiherya ni Yaawo, mwa natampi, mulipa-oohaamini,” ti yeeyo aarowaawe ohimya. Owo khaarowa... Ohela, owo aarowa ohela epaso vamutathaarini va mwiri. Owo khaarowa wiinalela hat’etthu. Owo profetaa, ni owo ti

mweettelo wa profeta eekeekhai. Awo anikhala ni Masu awo voohicala wira awo taani. Anakhaleru amey'aya wala atithi aya, khivanvirikana. Yesu aahiira. Hata khaawitthanne ame awe; awo khayaari. Owo aari Muluku. Muluku khorina maama. Vakhala wira aahikhalana, vano taani okhanle tiithi Awe? Uh-huh, uh-huh.

¹⁵⁰ Owo aanwuulumela ni waapwapwela. Owo aampwapwela khula muromolelo, okhala wira khuwaavo hata mmosa wa seiyo otekiwe vasulu va Masu. Nkinwerya ophwanya hata mmosa. Ni awo emalakarum wiromola, awo anoovirikanyiha Masu vaavo vo. Vano vanweryaneya sayi e . . . profeta oreerihia etthu Masu aampwapwelaaya? Onaamwi, owo ahithunaka wira yeeyo, wira ahimunanarihe munn'awe, masi nnakhala vo owo ohaana wira okhala wira owo profetaa. Ni owo ti namathoonyerya a Masu eekeekhai a Muluku, ni vaavo khonikhuma-Vo, mwa hata enamuna; nikanu vasulu va nikanu, ni yooruma vasulu va yooruma. Munnoonu entthunaaka ohimya? Mweettelo wa profeta eekeekhai.

¹⁵¹ Akavi aniira, "Pwiya, kaanitthuna Nyuwo mukikhalinhe profeta"? Owo khoniira eyo. Nnari. Owo khoniira eyo.

¹⁵² Owo aampwapwela khula yoowiira yoonanara ya ikereja, meera ala a cuuku ni ithu sothene iya awo ankhalaaya, meera a iturufu, otumihiwa wa soolya. Owo aampwapwela khula emosa wa seiyo. Owo aanvaviherya omooroni weiwo sikhummaaya-wo.

¹⁵³ Munuupuwela wira mwaammwaakhela? Nnari. Ekereja olelo khiyaarowa omwaakhela. aPentekosite omwaakhela? Ahe, owo aamphiya vale, aire, "Nyuwo nikhuru na maYesapeli oomettha maihi, khamunsuwela etthu SIISO ANIHIMYA T'APWIYA enihimyaaya? Munikhumela nno ni evistiitu yootita, khamunsuwela wira moottheke mwaha wo oraruwa khula nihiku n'axilopwana imiya sene?" Ti yeeyo owo aarowaawe ohimya.

¹⁵⁴ Yaamwiiriwa, "Ahe, mutthu ule a khalayi! Mutokweene owo, a ntari, mmukumihe vapulpitu vale. Naathukumanye, maatiministaratoore, matiyaakono, akumihiwe va."

¹⁵⁵ "Ahe, nyuwo nikhuru na anamirima miili ootakhaliwa." Ekeekhai. Amosi aampwapwela. Vano muniisiitthana, "Hiyo na . . . Hiyo nniira mpantte wa nikhuru *nla*. Hiyo nniira mpantte wa nikhuru *nle*." Nyuwo mwa a xetwani, tiithi anyu, maana owo ti ole onikhootta Masu.

¹⁵⁶ Muniira, "Miyu koolavula ilavulelo." Vano nto omettha maihi anyu? "Avuwihewe Muluku! Aleluya!" Ni Bibilia ohimye wira, "Eyo e—ti yoowuliha muru—etthu yoowuliha muru, muthiyana ovekela ni muru awe woometthiwa siiso." Vano wiisiitthana muKristu. Wuuliha muru. Mwiipurulele vanloothoni nipuro nlo, mwiilokiherye ni Muluku.

157 Munoowara ikuwo iyo sikhaani sookhuveya, n'ukhumela nno vapuwani, ni wiisaatalela vale, musuwelaka saana wira munoorarawa ni axilopwana emiya emosa khula nihiku. Khwira, Yesu ohimnye siiso, "Ole oninweha muthiyana anwerihaka murima oomala oraruwana yoowo." Owo t'oisoonihenrye, nto nyuwo muhiira mwawinyu. . .

158 Vaavo, nyuwo, muhookhwa wa itthu sa molumwenkuni. Nyuwo moohihimuwa mwa yeeyo, ntoko sihimaly'aka, wopaceryani. "Mwaamurukunxa muru mwaha wa ehaaya. Maitho anyu mwaamphunya mwaha wa etthu iyo yoonanara ya etampi, ohiya waaweha athiyana ni waakhalela ithaama. Nyuwo alopwana muniira etthu siiso ni wiisiitthana aKristu." Ti yeeyo owo aarowaawe wooleelani. Miyo kimphavela okuxa Masu awe voosiis'ula. Awo yaamukhala Masu awe. Maana, owo, muupuwele, owo profeta eekeekhai. Owo aahaana okhala ni Masu awo. Uh-huh. Miyo kinihimya Masu awe paahi. Ti yeeyo tu. Okhala wira, nyuwo mwamuruuha vale, owo ti Masu. Nto, va ari Masu, Mmansaya. Khino khokhalaniwe mutthu ene, masi mookhalana Masu awe, okhala wira owo aarowa okhalana Masu a Apwiya.

159 Khula mwixuttiho woopakiwa ni mutthu, owo aampwapwela, ntoko opatiiso "ni nsina n'Atithi, Mwaana, Erooho Yoowaarya." Owo aamukakhela-tho etthu iyo mpakha wa Ehimalelo. Owo aampwapwela, tivo khiwaarowa ohala hata wunkha waya. Ayo, mulopwana.

160 Akavi, nyuwo, akavi mukereja voosiis'ula yaarowa omwaakhela mwa yeeyo?

161 Vano awo, nikhuru nla na Nsina na Yesu, awo—awo yaamwiira, "Oh, hiyo naammukupali mwa yeeyo." Vano nto mutthenkeso anyu, owo aamukhaliha kapatti-kapatti. Ti yeeyo. Athiyana anyu oomettha maihi, ni nyuwo munivilela yeeyo. Ti yeeyo. Alopwana anyu, enamuna awo aniiraaya. Ti yeeyo.

162 Atthu anci-ene aniira, "Ti yooreera okhala profeta." Ti siiso, mwalikanana-ru ohiya itthu sothene sa molumwenkuni ni okhala ni Muluku ni Masu Awe. Hmm.

163 Nnari, hiyo khinaarowa omwaakhela mwa hata enamuna, mmiromoleloni sahu. Hiyo vekeekhai khinaarowa hata ocaliwa n'uwo.

164 Mmwiiwe owo aatathaka. Owo iirale, "Muluku ene yoowo munihimyaanyu omwaamini, Yoowo onimooopwetexani." Munrowa wira exeeni wa yeeyo? Muluku ene yoowo aPentekosite animwaamini aya, mwa miteko soohureya ni itthu awo aniiraaya ni anthuniheryaaya wiiriwa, Muluku ene yoowo onooruhela ehukumu mitthenkeso iyo. Eyo ekeekhaii. Tthiri ti yeeyo Amosi aahimenryawe.

165 “Oh,” awo yiirale, “hiyo nihaana Abrahamu. Nihaana—nihaana *ela*. Hiyo nihaana ikano. Nihaana anamukuttho. Nihaana maprofeta.”

166 Oh, munna, maitho ale yaaniphunyeya okathi aawehaawe, ni waarihelela Masu awo. Ayo, mulopwana. Vekeekhai. Awo khiyaarowa omwaakhela. Nnari, mulopwana. Owo khwira, “Awo animwaapwetexa ni miixuttiho sanyu soopakiwa ni mutthu.” Ti yeeyo owo aarowaawe wooleelani olelo. Owo aamuhimya yeeyo aahimmyawe okathi ule. Owo iirale, “Muluku ene yoowo munimutekelaanyu ikereja, khino mulivaka itolare imilyawu sene, ipa s’okokhorela munimutekelaanyu Yehova, munihimyanu wira munimphenta, Muluku ene yoowo onimoopwetexani okhala wira munookhootha Masu Awe.”

167 Ti siiso olelo! Muluku yoowo Amerika onihimyawe omurumeela onooruha ehukumu elapo ela ni opwetexa. Kinroromela wira eyo enookela voowiixerya muhinrowaanyu ohaleela. Yoowo ene munihimy’anyu wira munnimphenta, nto ni makano anyu oopakiwa ni mutthu, ni makhalelo oohureya ni emorelo murinaanyu mwa nyuwu, ni oohiya Masu a Muluku, onimoopwetexani nihiku nlo. Eyo ti SIISO ANIHIMYA T’APWIYA. Khenaahelela—tho etthu awo.

168 Mwiilokiherye ni Masu! Mwaalaleerye Ehapari yooreera; elapo yothene; mwaaleele Ekeekhai. Arumeyi anyakulihanaka ni okhuwela, ni wira itthu siiso. Athu anoolamula. Mitthenkeso sinimoohiyani. Athiyana anoottikinya muru aya, ni khanihiya maihi aya wunnuwa, mwaha wa hat’etthu. Owara ikuwo saya siiso vamosaru, mwaakha ti mwaakha. Ntoko oyeeherya maasi ottuli wa nrattha. “Vano munihimya wira munnimphenta Muluku?”

169 Owo iirale, Yesu iirale, “Nyuwo mukunxe ilimalelo sanyu khuhonona Sooruma sa Muluku.”

170 Eyo ti enamuna ya profeta eekeekhai. Munnona? Kahi enamuna yookhweya. Kahi ele athu othene anuupuwelaaya wira yaamukhala.

171 Etuphaka ni ekhuwelaka, athu othene yookwatakani nikhata, vano eyo ethoonyeryo wira khamuhiyo profeta eekeekhai. Eyo ti emosa wa ithoonyeryo s’eekeekhai wira khamurina etthu munihimy’anyu.

172 Liini atonko aya onkwata ottuli, vahikhanle wira yaahicaliwa ni itthu saya? Exeeni? Owo aamurukunuwa aapwapwele. Ekeekhai. Khiyaakhanle omukwataka Amosi ottuli. Awo khiyaakhanle omukwataka Eliya ottuli. Owo kheemererya itthu iyo. Nnari, mulopwana. Owo aahimeenrye Ekeekhai ya Muluku. Ni vakhala wira Erimu ti yuulupale saana, ni weiwo onrowaahu, vano naahiweryeke wiilokiherya ni itthu sikhaani ni sooyeva, ninrowa wiilokiherya sayi ni Erooho Iwe? Nihaana wiilokiherya ni Masu. Eyo t’inamuna ya profeta

eekeekhai. Hata emukheraka kapatti-kapatti, ohimya Yeeyo, ayo, owo ohaana okhaliha elapo kapatti-kapatti, ni Yeeyo. Eyo ekeekhaii. Masi eyo t'inamuna.

¹⁷³ Owo aamukhaliha kapatti-kapatti. Oh, wulu! Moosuwela etthu aahimenryawe? "Manyakunyaku," nyuwo mwaweha va, owo iirale, "khekhanle mwa kuveerunu anyu, eyo eri mwa nyuwo." Ti yeeyo owo aahimmy'awe. Ayo. "Manyakunyaku mukereja, mukhalelo anyu w'othunku, ti yeeyo ekumihenrye mulattu."

¹⁷⁴ Mwaha wa yeeyo komunismu onimoroxaawe muttethe olelo, kahi mwaha wa komunismu. Mwaha wa ekereja. Mwaha w'atthu. Olelo awo anisiitthana aKristu. Awo aniipa ntoko Malaikha. Masu oolokihiwa, n'ulavula vooratta, ntoko wira yaari Malaikha maalupale; ni ohaamini Masu a Muluku, ntoko axetwani. Ti yeeyo. Aniipa ntoko Nlaikha nuulupale, owara ntoko etthu ehinsuwelaaka, nave annikhootta Masu a Muluku.

¹⁷⁵ Mulopwana, onlaleya vapulpitu, onrowa weemela vale ni wiitthaniwa Totori, Reverendu, ni omukoha, "Bibilia onihimya opatiiso ni 'Nsina na Pwiya Yesu Kristu,' wala, 'Tithi, Mwaana, ni Erooho Yoowaarya?'" Nto owo onootheya wiitho wanyu ni okuxa, "Tithi, Mwaana, Erooho Yoowaarya." Vano wiithimya okhala mwaana a Muluku?

¹⁷⁶ Athiyana asuwelaka wira Bibilia onnaapwapwela wira ithu kamasa-kamasa, ni omettha maihi aya, ni wira ntoko olumwenku, ni owara ikuwo soohifayi ni ithu siiso, ni awo animwiira voohihiyererya, khula enamuna; n'ulavula ilavulelo, n'utupha, n'unyakula, ni okhalana mixovo sa athiyana aalweene, ni makhuru oottottha, ni waaveleeliha arumeyi vapuwani. Yoophiyerya okhala mwaari vamaithoni va Muluku. Ni, SIISO ANIHIMYA T'APWIYA, Owo onoopwetexa etthu yothene. Owo onimwiira.

¹⁷⁷ Kehiyo etthu yookhweya, masi owo ti mweettelo wa profeta eekeekhai. Olavula voolipa-vo, ni ohimya hata esikulihaka wala nnari.

¹⁷⁸ Yohani aari profeta eekeekhai. Owo iirale, "Epasso yooheliwa vamutathaarini va mwiri." Owo ti mweettelo aya. Vekeekhai.

¹⁷⁹ Mukattyamiho ori mwa yeeyo. Aniipa ntoko Malaikha, aniina ntoko axetwani iwo, wiina, etthimakasaka, ottikha iturufu, mapuro oowiikarana ni ikhavalu. aPentekosite, anrowa mapuro oothweela-mo, musineemani oosareya yaawo. Khula nipuro, na khula enamuna yo othweela wala etthu p'ithu ekina, anoorowa iwe, ni wiikarana ni ithu sothene sikina, ni ohimya wira aKristu, ni orowa n'unyakula, n'ulavula ilavulelo, ni wira mpantte wo orapiha inawu ni ekomunyawu.

¹⁸⁰ Vano, ti—ti, "Ntoko mwalapwa onthhikela vamarapheyoni vawe," ohimye profeta, "ni awo aniira siiso." Vakhala wira etthu iyo yaari ya olumwenku, yaahaana okumihiwa mwa

nyuwo, xeeni otthikelaka-tho yeeyo? Khweeli. Mphironi, emwiinaka twist, aniihana siiso, rock-and-roll, maihi oometthiwa, yaawaraka akaputtula. Oh, wulu! Yiisiihanaka aKristu. Mwaamuwerya. . . Nnari, vanreerela kihihimye.

¹⁸¹ Mwaha wa yeeyo kinaapwapwelaaka. Vakhala wira kinrowa okhala ni Masu *ala*, vakhala wira Masu ala anikirweela miyo, kinookhala ni Masu yaala. Ela t'ile enoorwa wa miyo, Masu. Opwapwela!

¹⁸² Anihimya weettihiwa ni Erooho Yoowaarya, ni wira itthu iyo. Mwaamuwerya omuthokelela muthiyana, eettihiwaka ni Erooho Yoowaarya, ohiya maihi awe ometthiwa, Erooho Yoowaarya ekhoottihaka? Vano enamuna xeeni ya Mutthu okhanle Erooho Yoowaarya? Mwaamuwerya otthokelela?

¹⁸³ Mwaamuwerya omuthokelela mulaleyi weemela vapulpitu, nto mutthu omutharamula wira amoonihe nipuro nimosu mutthu ti mutthu otonko awe opatisiwa siromoliwaka ititulu sa "Tithi, Mwaana, ni Erooho Yoowaarya," ni otheya wiitho wanyu ni owiihanani namathipelela, mwaha wo opatisaka ni Nsina na Yesu Kristu, ni wira owo oneettihiwa ni Erooho, ni wira owo ookhalana Erooho Yoowaarya? Erooho Yoowaarya yaamukhootta Masu Aya Eneene? Nnari, mulopwana. Uh-huh. Munnoona? Kinroromela wira munniiwa saana.

¹⁸⁴ Nkisuwenle okathi xeeni. Khino ephutuwelo enttharelana khenikihiya. Masi, mpakha okathi yoowo, kinrowa weemela vaavale ni Masu. Kakumana-ru ni nyuwo wu w'Olamuliwani, miyo kinrowa weemela vaavale ni Masu awo. Ti yeeyo kinaamini aka okhala Ekeekhai.

¹⁸⁵ Nnari, khamuniira itthu siiso, ni ohimya wira mookhalana Erooho Yoowaarya. Kaahirowa wa mwaara a murumeyi mmosa emaara emosa, okilaanthe-ene vale ni evistiitu, yaari yoohiloka woona.

Nyuwo muniira, "Nyuwo khamurina hata ihakhi."

¹⁸⁶ Miyo kookhalana ehakhi. Awo Masuu. Olaleya Yaawo othene. Nyuwo munoosyaka itthu iyo, alaleyi anci-ene ookenyeya, okhala wira awo kharina ominy-. . . Khino nyuwo hata khamwiitthaniwe wira mulaleye, opacerya wene. Ayo. Masi murumeyi eekeekhai a Muluku onookhala oratta-ene ni Masu awo. Ekeekhai.

¹⁸⁷ Mwaara a murumeyi okilaanthe vale, othene ootiteya muvistiituni, ni ipirinku silenleyaka, ni itthu soowoottiwa wiitho, ni maihi oometthiwa. Nave, Muluku opwapwelaka etthu yothene ntoko yoonanara. Vano nto muhimyaka wira mookhalana Erooho Yoowaarya?

¹⁸⁸ Miyo kaalaleya oPhoenix nno, woohikhala khalayi, mwaha w'etthu siiso, ni mwaara a murumeyi okilaanthe vaplataforma, ni emosa wa imethelo iya sa maihi sa amiravo

othene oonyokotoiwiwa, ni evistiitu hata yahaattiyelela ikuwo sawe sa muhina. Khaawerya okhuneela makutha awe. Saanihala isentiimeturu ntoko muloko wala muloko ni piili wira ekhuneele makutha awe, okilaanthe-ene vale; atuphaka ni ahoolelaka masipo. Miyo kaahipwapwela voolipaxa vaaweryaaka. Vekeekhai, owo khonrowa otthikela okilattula. Miyo nkinwehererya. Masi owo onnisuwela eri yooreera ni yoonanara. Keemela-ru w'Olamuliwani, eyo khekhanle-tho mmatatani mwaka. Vano anoophiya ni wira . . .

¹⁸⁹ Mulopwana, oniitthaniwa mwiixuttihi, yeeyo kihinihimyaaka wira kahiyo, aahikhaliha moonelo nihiku nlo, ohoolo w'apatthani aka amosa-amosa epooma emosa kaaryaaka-wo. Munnimusuwela munn'owo. Nto munn'ola khurwa. Owo khwira, ahe, owo khwira, "Hiyo naahikhalana Munna Branham va emaara emosa." Epooma emosa, Onikhuma nsuwa wu. Nto mulopwan'ola khwira, "Oh, Munna Branham mutthu ooreera murima." Munnona? Owo aanisuwela oratteene wira ahihimye etthu ya mukhalelo wa murima. Khwira, "Munna Branham, masi muhiwe ifiita sawe, okhala wira iyo sinimootikinihani."

¹⁹⁰ Nto khwiiraneya okhala mmosa w'axipatthani aka eemenle vaavale, khwira, "Minuutu mmosa paahi, mulopwana! Miyo kaahitikinihiwa mpakha *vaiwalyaaka* ifiita." Ayo. Eyo t'evirikanelo. "Nkaawerya osuwela saana moota Muluku oowaarya aarowaawe ovilela itthu ntoko iyo, ntoko siniiraanyu nyuwo othene." Ayo.

¹⁹¹ Mutthu ene yoowo, mukina oryeene ni yoowo, aaheemela nipuro nimosa woohikhala khalayi, khwira, "Munna Branham profetaa. Owo onniwerya olamula itthu. Ni itthu ntoko . . . Masi," khwira, "vano, muhiwelele Mwiixuttihi awe, okhala wira owo khorina exariya." Onanvahuwa, nuulumo noonanara ntoko nlo!

¹⁹² Khamunsuwela wira yakhala e . . . Miyo nkihiyo profeta. Masi Masu a Muluku yakhala eekeekhai, Awo animurweela profeta. "Masu a Apwiya jaarweenle maprofeta." Yaari yaawo yaataphulela Masu. Nto, nyuwo moone, nyuwo khamu . . .

¹⁹³ Eyo hata kherina maana, wiipitha paahi ottuli wa muromolelo woohikhala ni maana, nihiku nlo onookomowa ni onyeela nkwitha, ni opweteya omooroni.

¹⁹⁴ Masi Masu a Muluku anookhala mahiku othene. Vamwala vaavo Miyo kinookhaliha miroromelo saka mahiku othene, vasulu va Masu a Apwiya. Muhiye itthu sothene sikina sipwine. Miyo yakipweteya apatthani othene, itthu sothene sikina, opatthani aka ori mwa Kristu.

Miroromelo saka khasilipanne etthu
 Woohikhala Masu a Yesu ni exariya;
 Okathi sothene sinrukurerya munep'aka
 simmoraaya,

Vano Owo ti nrromelo aka wothene ni mukhaliheryo.

¹⁹⁵ Okathi kapwitthi ule aarummy'awe nihiku nlo nto miyo koono. . . Koono wira kaahikhwa. Kaahikhalana moonelo wa murettele. Miyo khuwehaweha. Kuupuwela, "Ahe, ela ti yothene." Exeeni yaarowa okireerela muromolelo okathi uwo? Exeeni yaarowa okireerela mutthenkeso okathi uwo? Miyo kaamwiira keemenle wu woophukiwani wa mooro wa Muluku, wira kiphukiwe ni Masu *ala*.

¹⁹⁶ Enaamwi khino kaarowa opaheya, ni okhuneya, ni onyokotowa, ni waakhaliha kapatti-kapatti, athu anci-ene, masi kinrromela owerya, okumiha vale enuku yooloka, ya Masu a Muluku, ni vale olipiha munepa wa Ehimalelo. Eyo ekeekhaii. Muluku amukuxe mmatatani Mwawe ni amukhalihe mwaana oowiiwelela.

¹⁹⁷ Vanweryaneya sayi—vanweryaneya sayi mulopwana, oneettihiwa ni Erooho Yoowaarya, wira etthu ntoko eyo? Wala, muthiyana ni Erooho Yoowaarya, wira itthu ntoko iyo? Nnari. Owo t'owaarya. Ni Ekumi Awe yakhala mwa nyuwo, nyuwo munkhala mmosaru. Nyuwo munookhala oolikana ni Yoowo.

¹⁹⁸ Isarayeli, ntoko hiyo, yuupuwela wira okhala wira yaanikelela ohoolo ni ovarihana waya ni akina, wira Muluku aahisiveleliwa ni yeeyo. Vano, moosuwela, hiyo ninuupuwela yeeyo olelo.

¹⁹⁹ Miyo kaahilavula n'axilopwana amosa-amosa nno woohikhala khalayi, wooteeli, mahiku vakhani avinre, athu aalupale muhina mwa itiini. Vano awo khukiirela, "Muluku onnooniherya wira Owo ori ni hiyo. Vano, hiyo nihaacerereya mwaisana, Munna Branham," Kinooliyala imiya kavi, siiso.

²⁰⁰ Miyo khwira, "Eyo kehiyo ekupaleliwo hata vakhani." Uh-huh. Eyo ekeekhaii. Onamuttompe orimwaacerereya, mwaisana, ntoko ipursento miloko miraru; eyo yooniherya wira Muluku aari ni onamuttompe? [Muthukumano oniira, "Nnari."—Mol.] Uh-huh. Uh-huh. Uh-huh. Vekeekhai. Huh! Yoohimya eyo khelonke. Nnari. Khimukhanle wira. Nnari, mulopwana. Muluku onkhala ni Masu Awe. Khula mutthu mukina onookhala ni Masu Awe, owo akhalaru naxariya. Vaareera.

²⁰¹ Awo yoono wira, okhala wira awo yaahikhalana ovarihana! Vano, va, ninookela va, okathi vakhani paahi, mwa myaha sa kuveerunu. Elapo ahu yookhootta Masu a Muluku, siiso Isarayeli siiralyawe. Awo aakhootta Masu a Muluku, ni athu aya, anamukuttho aya, ni maprofeta, ni sikina, anlaleerya itthu sooreera w'awo. Vano awo. . . Nikhanle wiiraka exeeni woohikhala olaleerya vooanara, okhala wira ti yoovirikana ni Masu! Yoolamuliwa. "Elapo ahu, yuulupale ni yoophenteya,

elipiheriwe vasulu va . . . musuwelelo ahu w'axitiithi ahu." Vano mutthikele ele awo yaarinaaya. Uh-huh. Khweeli. Vekeekhai.

²⁰² Isarayeli aari nloko nuulupale. Nkaaweheni axitiithi aya, masi Muluku khaawiinanenle. Profeta ole a ntari mutokweene aarihelela Masu yaawo, nto khwiiraneya siiso ntoko owo saahimmyawe. Mmusome wahala anyu va musuwele yahaakhanle ekeekhai. Yaahiiraneya siiso ntoko owo sahimmyawe. Vano owo aanaapwapwela, nnakhala vo, awo yeemenle-ene vale, ni anamukuttho oowaarya ni ikuwo soowaarya, atathelaka *ela*; ni khiyaattikinya ntata nimoso, enamuna *ela* wala enamuna *ele*, okhala wira yaari ethu enamuna *ela*, elimalelo wala ethu.

²⁰³ Yesu khwira, "Nyuwo mwa a tiithi anyu, xetwani, ni miteko sawe nyuwo munoovara." Awo yaahinvara Owo khimuhukhumu, ni khimuthomeya vamwirini, khumwiiva. Vekeekhai ekhweeli. Muluku khimuhihimuxa. Ayo, mulopwana.

²⁰⁴ Nnari, awo nnari. Hiyo khinaarowa omwaaminni Amosi olelo, nnakhala tu. Ni olelo hiyo noopaka ovarihana. Nookhalana ele eniitthanaahu olelo . . . Ninuupuwela wira Muluku "onnikupalela," okhala wira mitthenkeso sahu sinimwaacerereya ni—ni sothene sinrowa saana. Hiyo ninuupuwela wira Muluku "onnikupalela" yeeyo. Moosuwela, aalempwa, kookupali, maPrustante oophiyaka imilyawu piili wala tthaaru voowaatta. Ni aKatolika ahaacerereya imilyawu soowaatta. Munnona? Awo anuupuwela wira eyo ekupalelo ya Muluku, mwaha wa awo okhala aKatolika. maPrustante anuupuwela wira ekupalelo ya Muluku, awo okhala maPrustante. Huh! Eyo ethiru. Awo malaxi wira epahiwe. Iyo ittuurwa sa aatomu. Iwo oviruwa wa Muluku onthukumanyeya, wira ophutuwe. Eyo ekeekhai voolikana.

Mukiwiryane. Kinimooleelani Masu a Apwiya. Amen.

²⁰⁵ Nrowe niiwehe. Nkawehani olumwenku olelo. Nkawehani elapo ahu. Niitakaihale ni N.U. Exeeni eri mmo? Nikhuru na atakhali. Ni hiyo, ni ominyala wo ohitthuniherya hata mavekelo wiiriwa mithukumano sahu sihinatthi opacerya.

²⁰⁶ Nkimanle osoma va, "Vanweryaneya sayi aili weetta vamosa ehiiwananaka? Muluku khoniira ethu Owo ohitonko owooniherya esiiri arumeyi Awe, maprofeta. Vanweryaneya sayi aili weetta vamosa ehiiwananaka?"

²⁰⁷ Nave, nirine-ene Amaka, Buda, oohimutthuna Muluku, ootakhala, owiisoona, itthu sothene sikina, mwemmo. Nyuwo munuupuwela—nyuwo munuupuwela wira Muluku aamuwerya okhala mw'ethu siiso?

²⁰⁸ "Ahe," nyuwo muniira, "wira, ahe, hiyo niri moovarianani ni yaawo. Hiyo nihaana okhapeleliwa wothene wa Onikela nsuwa."

209 Awo yaahikhalana ilapo sothene wu, sookhapeleliwa. Masi profeta ole khwira, “Muluku onimooopwetexani. Muluku ene yoowo munimurumeelaanyu onimooopwetexani, mwaha wa ololo anyu.” Owo aamuhimya etthu emosaru voosiis’ula. Owo aampwapwela okhuma Empa Yootteela mpakha ematta yooahaawa. Owo vekeekhai aamwiira. Owo aamwaaapwapwela, ni Masu a Muluku. Owo vekeekhai aamwiira. Owo ti mweetelo wa profeta eekeekhai.

210 “Nrowe niiwehe, ikereja. Oh, hiyo na ekereja Katolika yuulupale yoowaarya y’oRooma!” Ehimmwe, mBibiliani, wira NAMUTTOMPE.

211 “Hiyo n’axitiithi a maphaatiri, ikereja Prustante, sothene soowiiraana, ni oniiithaniwa m. . . oniiithaniwa Mwaataano wa Ikereja sa Mulaponi.” Anamararuwa a NAMUTTOMPE, Bibilia oohimya. Eyo vekeekhai t’ile Owo ohimyyaawe. Uh-huh. Ni nnakhala vo hiyo ninnuupuwela, “Nto vano ikereja sothene sinimwiiraana.”

212 Mwenye Collins, mpatthani aka mmosa, munna a oCalifornia, ahiiso, Arizona wu. Yawinyu- . . . yawinyu. . . Pate, [Munna Neville oniira, “Elmer.”—Mol.] Elmer. Miyo kiirale, “Ahe, kinoona wira muneetta ekereja emosa yooreera Metotista.”

213 Khwira, “Miyo kirookhuma okathi yitakanxaly’aya ni Mwaataano owo wa Ikereja iwe.”

214 Miyo khwira, “Muluku ooreeriheni. Munnikhuveela Omwene, munna.” Uh-huh. Ayo, mulopwana.

215 Makano, alipanaka wiiraana na atthu, nave ni mwiixuttiho aya woopakiwa ni mutthu, ni ahiyaka Masu a Muluku. Etthu entthunaahu profeta olelo, onriha saana Masu ale mme. Eyo ekeekhai tu. Ayo.

216 Awo, awo anoona okhala oolipa mmansaya. “Oh, hiyo nihiitakanxa. Hiyo, aPentekosite, vekeekhai, hiyo nihiitakanxa ni Mwaataano wa Ikereja sa Mulaponi, okhala wira memmo nookhalana opatthana. Ninimwaakuxa.” Ntoko muthiyana arowaka mpaare, orowa ohapaliwa ni iy’awe, wira amuruuhe wa Muluku. Vootepaxa ntoko iya arowaka ni mwaar’awe, mahiku ala, opaare, orowa ohapaliwa, wira amuruuhe wa Muluku. Ethiru! Mukhume vapuwani va xetwani.

217 Etthu yaakhootaka Masu awo, miyo kinnivirikanya. Eyo ennikhaliha oovirikanya khula mutthenkeso, okhala wira ti woovirikanya Masu. Yaahaana omwiiriha khula mulipaa-oowaamini woona siiso. Ha!

“Ahe,” awo aniira, “masi, muupuwele, hiyo nookhalana. . . .”

218 Kookhalana artiiku muulupale vapapheloni va ihapari, mutthu okiveleelinhe awe okhuma wArizona, ya moota tiithi ula *Lexe ni lexe*, nihiku nlo, iirale, “Paapa Yohani a Miloko Miili ni

Aili,” wala etthu p’itthu awo animwiihanaaya, “aahikhalana . . . Owo mutthu ooreera murima. Owo ti mutthu mmosa otonko olavula sa wiiraaniha ikereja, aKatolika ni maPrustante, vamosa.” Khwira, “Khino kheniireya mahiku ahu, masi, miyaakha soophiyaka muloko ni mithanu wala miloko miili ohoolo enimwiiraneya.”

219 Miyo kuupuwela, “Mmiravo, nyuwo muryeene tiithi, munoolaleerya, nave khamunsuwela.”

220 “Vahooxa ovikana sinuupuwelahu.” Mmiravo okilepenle, aahilepa vanikukhuni, “Vahooxa ovikana sinuupuwelahu.” Owo aarookhala aiwaka ifiita, nave. Ayo, mulopwana. Owo khwira, “Vahooxa ovikana sinuupuwelahu.” Khwira, “Munna Branham, khamuhimye ela, miyaakha sivinre?”

221 Miyo khwira, “Vekeekhai.” Ayo, mulopwana. Enimoorwa wiiraneya, okhala wira ti Masu a Apwiya. Ehaana wiiraneya. Vekeekhai. Ayo.

222 Awo aniira, “Ahe, tiithi ula oowaarya, khamunuupuwela wira aahaana osuwela etthu yoovikana eyo?” Nnari, mulopwana. Owo aakhoottaka-ru Masu a Muluku, ni oweha Awo siiso, owo khonwerya.

223 Miyo nkincala mapaapa akavi, maprofeta, ni etthu ekina murinaanyu eriyari anyu. Vakhala wira moohiya Masu, moohiya Masu. Ti yeeyo. Vaarowa oweryaneya sayi Muluku oreeriha etthu iyo, awo akhoottaka Masu yaawo a Muluku? Onwerya sayi Owo oreeriha etthu ehikhanle Masu Awe, etthu evirikanne ni Masu Awe? Onwerya sayi Owo okhootta Yaawo?

224 Munwerya sayi omureeriha kankuru onookhuurani? Mwaarowa owerya sayi oreeriha e—e—efiiyu ya eletrisitaate munvarelaanyu, nyuwo munaira, “Oh, mukivarele ni mukipaha”? Waamukhala ololo.

225 Onwerya sayi Muluku oreeriha etthu envirikanya Masu Awe? Vano mutthikele Masu! Uh-huh.

226 Nyuwo nikhuru n’alaleyi, ntoko alapwa ooxaya, exeeni eniwiirani? Nyuwo munookhumela nno n’utumiha ihakhi sanyu s’eyuulupale mwaha wa muhasa wa muhisi, wira mmweetiheke Cadillac wala etthu siiso, wala empa, yuulupale nipuro nlo, ni ekereja yuulupale ya itoolare emilyawu. Ni itthu sothene iyo siiso, ni otumiha ihakhi sanyu s’eyuulupale, ni wuuliwa muru ni woova olaleerya Masu a Muluku muthukumano anyu. Eyi, khamunuuliwa muru? Ni ohimya wira mwa murumeyi, profeta a Muluku, mutumihaka ihaakhi sanyu s’eyuulupale mwaha wa muhasa wa molumwenkuni. Exeeni enrowaanyu ohepha? Yeele Esawu aahemphe awe. Oh, otakhaliwa xeeni!

227 Oh, nnari! Muluku oowaarya onikhapelela Masu Awe, wira olipiherye Yaawo, khaakhanle oreerihaka etthu ekhanle yoovirikanya Masu Awe. Vano nwiriyan. Koosuwela wira

kinootthimaka wookivira okathi, ni khino kinimoosamihani. Masi, nwehe, kintthuna kookoheni etthu. Vaaweryaneya sayi Muluku oowaarya, Yoowo olavunle Masu Awe khwira, “Vano, erimu n’ilapo ya vathi sinoovira, masi Awo khanivira, nnakhala Nuulumo nimosa na Yaawo,” vano Owo aakhanle okuxaka sayi etthu envirikanya Yaawo ni oreeraha? Vaaweryaneya sayi Owo wira? Nkawehani. Owo onnooniherya, Mwaneene. Owo onnilipiherya Masu Awe. Owo onihimya ele eri yooreera, kahi mwaha wo omempuru.

²²⁸ Nkanweheni Mowabi. Mowabi aahikhalana Masu Awe, nave, Mowabi. Isarayeli aahikhalana Masu Awe; ni Mowabi ooneya ntoko oottittimiha, ni Masu Awe. Awo yaahivaha mikuttho mithanu na miili, amwaanyompe ooreerela, vasulu v’altari athanu n’anli; nummeru nooloka, mukuttho wooloka voomalela. Vano, ohiya vo, owo aakunxe ipwittipwitthi thanu ni piili, ehimiyaka wira awo yaanaamini orwa wa Mwana a Muluku, ni yaahivaha iwe, ni pixipu aya muulupale. Oottittimihiwa aya othene, anamukuttho aya othene ni akhulupale aya a anamukuttho, sothene sikina, yeemenle erukurenrye ni mamwene aya ni makhulupale, ni sikina, ni khuvaha yeela vatiini-vo saaweryaaya okhala, evirikanyaka wa Isarayeli.

²²⁹ Ni vale aari Isarayeli, yaakhala ntoko, nikhuru nikhaani nookhootta. Masi exeeni yaari ni Isarayeli? Muluku aari mukampanyani mwaya. Owo aamwiisooniherya Mmansawe, wira Owo aari ni yaawo. Munnona?

²³⁰ Hata wira yaakhalanne axitiithi akavi, mapaapa, wala sikina, Muluku khokhanle okhalaka n’awo mpakha Owo wiisooniherya Mmansawe ni yaawo. Ni vakhalaru wira awo ari ota wa Masu Awe, ni akhoottaka Masu Awe, Owo onwerya sayi okhala ni yaawo? Hata ithoonyeryo sa Muluku mukumi siri eriyari aya.

²³¹ Vaaweryaneya sayi Muluku okhala eriyari ya N.U., vahiweryaneyaka aili weetta vamosa ehiiwananaka?

²³² Vano, nkawehani va. Yookhala Ekereja ya Kristu, eniihaniwa siiso, yiitakanxale ni aPentekosite. aPentekosite anihimya wira annaamini olavula ilavulelo. Annaamini eyooniheryo ya Erooho Yoowaarya, wira olavula ilavulelo. Awo anihimya wira annaamini *ela*, *ele*, ni *ekina*. Awo annaamini ithoonyeryo ni mitikiniho. Ekereja ya Kristu enimwaatheya, eniira, “Nyuwo nikhuru n’atthu oohisuwela! Eyo yaari mahiku avinre.” Vanweryaneya sayi aili weetta vamosa ehiiwananaka? Ni awo aatakanxana. Exeeni aniiraaya? Awo amphavela olipa mmosa ni mukhw’awe. Ottaiwene ni itthu iyo!

²³³ Olipa waka ori mwa Kristu ni mwa Masu Awe, maana Masu Awe ti Yoowo mwaneene. Ti yeeyo.

Hata ithoonyeryo sa Muluku mukumi, nnakhala.

234 Ti yeeyo Yesu ohimmy'awe, "Miyo kaahooniheryeke Masu, vano muhaaminiki Yaawo. Muluku aahilavuleke ni olaleerya ovira mwa Miyo, ni ohimya ovira mwa Miyo ni wira ovira mwa Miyo voolikana ele Mesiya orinaawe wira, weeso muhikaaminiki."

235 Vano, mmiravo mmosa onihimya wira owo profeta oveleelihiwe ni Muluku, ni khunakhootta Masu? Muluku amoriwe ikharari ni etthu ene yeeyo! Onwerya sayi Muluku wira yeeyo?

236 Mukihiye kikohe, kikohe, ti yeela vano. Miyo—miyo nkisuwenle liini onrowaaka-tho olavula ni nyuwo. Eyo ti ya Muluku. Miyo kinthukumanya Yolya paahi, ntoko Owo saakilenle awe mwa yoowoona ele okathi ule, kinihela Yeeyo mmiyaapuni.

237 Nyuwo khino mwaamukikoha, "Aawerya sayi Amosi woona khalayi ene etthu yaarowa waakhumelela?" Vano, eyo yaakhala ntoko yoorera.

238 Nkawehani. Vano nkawehani va. Vano, nwiriyane oratteene vano. Okhala wira, Ela yothene eri mufiitani, ni Eyo enrowa, Eyo enrowa mulaponi mothene. Munnona? Vano moota... Nkawehani va.

239 Isarayeli aari vale. Iseminaariyu saya saari sooreerela ovikana saatonko aya okhala. Khaakhanle mutthu aahaaxa. Awo yaahikhalana itiini saya. Khaakhanle hata mutthu iira, "Khimukhanle omukokhorelaka Yehova." "Mukeleleke ohoolo," yaahimye maloko a epakawu, "mukokhoreleke. Nookhalana wiiwanana, mmosa ni mukhw'awe."

240 Profeta ole aaniwerya woona ohoolo wa yeeyo. Munnona? Ni profeta olelo aamuwerya woona ohoolo wa yeeyo. Munnona?

241 "Mukeleleke ohoolo." Nto Isarayeli khwira, "Ahe, nrowe nilyeeke, niwurye, ni nitthapeke." Tivo awo khuthukumana nikhuru ni khupaka iyaaminelo kamosa-kamosa, ni mitthenkeso, miromolelo, ni itthu, khureeriha saana. Nto axithiyana aya yaakhala paahi mwa ithaama ni etampi iwe. Eyi, yaanirowa mmampaani muniiniwa ni sothene, awanre-ene nuusu, ivistiitu sikhaani sa seeta. Vakhala wira mootoko woona emosa wa—ihantisi saya sa mahiku ale, moota yooneyaaya, oh, voohalela okhala epantte ya neeraru ntoko sinooneyaaya olelo. Anaamwi, voohitepaxa, okhala wira khiyaawerya. Ayo. Ni moota siiraaya ni wiiseettiha siiso; ni mamwene, ni anamukuttho, ni atthu othene akina.

242 Yesu ohimye wira, "Nyuwo munlya mmaitthokoni mwa anaamukhweli, nyuwo anamirima miili." Owo oohimya. Ni itthu iya sothene awo yiiraaya.

243 Profet'ole eemenle-ene vale, owehaka ele, elapo ele siisaale, khivanxankiha murim'awe waainiwaaya. Ayo, mulopwana.

²⁴⁴ Vano, nyuwo muniira, “Owo aasuwenle sayi etthu yaarowa okhumelela? Aawerya sayi owo wona khalayi ene? Sayi?” Yothene yaakhala ntoko yooreera. Vano, awo yaahikhalana sinci-ene soolya. Yaahikhalana sinci-ene s’owara. Awo, awo yaahikhalana ikereja saya suulupale. Awo yaanikelela ohoolo. Musurukhu woowaaliwa mapuro othene, ithaama. Soowiina mphironi, ohilakeya, ni itthu sothene sikina siiraneyaka, ni sothene seettaka saana. Siiso ntoko Amerika olelo. Televisawu yoosareya iperwa soonanara, athiyana oorula ikuwo nuusu, itthu sothene sikina. Itthu sothene munoonaanyu ti soonanara ni etampi. Khamurina oweha mutelevisawuni, mutthukule maitho paahi, nwehe khula nipuro. Aximwali, amiravo, alopwana, athiyana: anvuraka sikaro, awuryaka. maYesapeli ale aniisihana aKristu. Axetwani ootakhala aniisihana aMetotista, aPatista, maPrespiteriyano, aKatolika, ni aPentekosite. Uh-huh. Uh-huh.

Khivanxankiha eyo yaaphunnye aya maitho awe okathi owehalyawe. Huh! Eyo ekeekhai.

²⁴⁵ “Sothene sinooneya okhala saana. Munwerya sayi woopola? Naarowaka wira. . . Sayi? Sayi? Nkawehani va. Ahe, hiyo—hiyo nookhalana-tho emilyawu ntero. Hiyo—hiyo nookhalana. . . Hiyo. . . Ipa sahu ti, oh, ikereja sahu ti suulupale saana, nihaana oteka ikereja isya. Ahe, hiyo nihaana musurukhu munci-ene, hiyo khaninsuwela etthu yo wiiraha. Vano, hiyo ninteka mapuro ootepa oreera mu—mulaponi. Ikereja suulupalexa sikhanelle, ti hiyo nirina. Ni hiyo nlelo nihaana musurukhu munci-ene. Khamunuupuwela wira Muluku oonireeriha?” Nnari. Nyuwo mookhuma Mmasuni Mwawe.

²⁴⁶ “Nto, Munna Branham, nyuwo munihimya wira Muluku onoorowa opwetexa ela?” Ayo, sothene.

“Munsuwela sayi?” Amosi, musuwenle sayi?

²⁴⁷ Siiso ntoko meetiku athokosaka mwaha. Vamphwanyaawe eretta eri mwa muretta, owo onnisuwela etthu yo wira. Owo onnisuwela etthu muretta owo orinaawe. Owo onnisuwela moota etempe aya. Ni owo onnisuwela etthu enrowa okhumelela. Ti siiso ni profeta, profeta eekeekhai, owo oonaka vale. Miyo khenikicala etthu eniraanyu. Oonaka etampi etepaka, kankuru onikhuura. Ni ori vootepaxa, mwa aPentekosite ni othene akina, vahinweryaneyaaya otthikela ottuli. Ori enamuna yootepaxa. Anrowa opweteya.

²⁴⁸ Ti siiso Amosi aaweryaawe omwaleya mwaha. Owo aamwaleiye ni Masu a Muluku. Ti siiso pro-. . . profeta eekeekhai ommwaleya awe mwaha, ni waahimeerya athiyana awo, “Muheererye nnakhala orowa Woolamuliwani ni maihi oometthiwa, musuwelaka wira khimukhanle wiiraka.” Onoohimeeryaaweni nyuwo alopwana, nyuwo akina, ni nyuwo alaleyi munikhootta Masu, ni mooneyaka ntoko oothunku,

mwiitakanxaka mmutthenkesoni, wira musyake mwaha ene, musuwelaka wira khimwaakhanle wiiraka. Nyuwo muniweha Masu ene yaawo maprofeta eekeekhai anwehaaya. Omwaleya wa mwaha onihimya wira, “Okhwa! Ovalaanihiwa!” Siiso ntoko meetiku, owo onnisuwela mwaha ene. Owo onnisuwela muthinto xeeni wa ineneeryo orinaaya.

249 Nkawehani elapo ela. Mwaairaka wira, “aPentekosite aamalamala.” Nave, awo nnakhala ahootthuniheryakani orwa okereja, okhala wira nyuwo munaalaleerya athiyana mwaha wa maihi oometthiwa, ni Bibilia onnipwapwela yeeyo. Owoova wira munohimya etthu ya . . .

250 Nno nihiku nlo, okathi waatthokihaaka ikampaanya kamosa-kamosa, Roy Borders aatthokiha, Olimani Onkela nsuwa, awo khimwiitthanela, nikhuru n’arumeyi, oophiyaka, oh, kinoona wira miloko mixexe wala miloko mithanu, weiwo waarinaaka muthukumano muulupale. Awo khwira, “Mwenye Borders, kintthuna kookoheni etthu.” Khwira, “Ekeekhai wira Munna Branham onromola Nsina na Pwiya Yesu Kristu wira opatise?”

251 Mwenye Borders, mulopwana mmosa oottittimiheya saana, ntoko sinimusuwelaanyu Munna Borders a nno. Owo khwira, “Mwaatthu,” owo khwira, “Munna Branham, owo akhala mukampaanyani, ota, ntoko ela,” khwira, “owo khonlaleya. Owo onookelela ohoolo paahi ni waavekelela aretta anyu. Ti yeeyo owo oniiraawe.”

252 Khwira, “Kahi yeeyo kookohalyaakani,” khuhimya humu. “Onniira?” Vano, awo yaahikhalana ifiita. Awo annisuwela. Khwira, “Owo ompatisa ni Nsina na Yesu Kristu?”

253 Owo khwira, “Ayo, mukereja mwawe. Nlo ti nipuro nimosa paahi owo ompatisaawe, mukereja mwawe yoowo.”

254 Owo khwira, “Ti yeeyo. Ti yeeyo tu entthunaaka osuwela. Hiyo kxanimmutthuna. Hiyo kxanintthuna okawanyeya iwo eriyari y’atthu ahu.”

255 Nto nihiku nlo, okathi mpatthani aka ooreera murima, Ed Daulton, aakhenly’awe ewarakha ya ekereja Patista. Owo khwira, “Hiyo nnoowoomolani mopatthanani wa aPatista, okhala wira muhiitakanxa ni okawanyeya wo opatisiwa ni Nsina na Yesu.”

256 Miyo okisivela omweemererya Paulo, “Ele olumwenku onihanaaya okawanyeya, eyo p’inamuna miyo onimukokhorelaaka Muluku, okhala wira ti Masu Awe.” Ayo, mulopwana. Ayo. Oh, vekeekhai.

257 Tothoro onoomwaleya mwaha ene. Owo onnoona vatthu vary’aya. Profeta eekeekhai onimwaleya mwaha, ni Masu. Owo exeeni? Tothoro onimwaleya mwaha awe, ni ineneeryo. Eyo eekeekhai? Owo onweha ineneeryo ni onnoona mulattu orina

muretta. Owo onoona moota etempe aya, ni wira, “Khiivo etthu ekhanle wiiriwaka.”

²⁵⁸ Ni profeta eekeekhai onkuxa Masu a Muluku ni omwaleya miyaha, n’uhela-mo Murette. Vano atthu anoomurihelela Eyo wiitho wawe. Exeeni enrowa okhumelela? Opweteya, ti yeeyo tu; oophenta soopuha, nikhuru na molumwenkuni niniitthaniwa onamirima miili! Masi owo ti mweettelo wa profeta eekeekhai. Munnona? Oh, wulu!

²⁵⁹ Owo onnoona iretta. Owo aahoona wira awo yaaroohiya Masu. Owo aahoona Masu. Ni owo aanisuwela sookhumela saarwa. Owo aahoona ithaama waakhalaaya-mo, aahoona enamuna athiyana ale yiiraaya. Owo aahoona enamuna anamukuttho ale yiiraaya, moota awo yaahiyalyaya okokhorela w’eekeekhai wa Muluku, n’itthu siiso. Iwe, owo aahikhalana yo—owo aahikhalana yoowaakhula. Owo iirale, “Muluku yoowo munihimy’anyu wira munoorumeela onimooopwetexani.”

“Mwaha wa xeeni?”

²⁶⁰ “Nyuwo khamutthanre Sooruma Saka.” Nave nnakhala vo yuupuwela wira yaanithhara. Miyo nkinammala-ru osoma va? versiikulu 2, 4. . . kapiitulu 2, versiikulu 4, “Okhala wira Miyo kihoothanlani wira mukhale e . . . Wa maloko othene a mulaponi, koothanlalani nyuwo, nave nnakhala vo munookhootha weettela Sooruma Saka.” Nyuwo munuupuwela. . .

²⁶¹ Profet’ole mwaamukhaani, a ntari eemenle-ene vale ni ireru iye soottweelela; malepa mmaithoni mwawe, aphanimaka mooro; alavulaka nnikhuru nle n’anamukuttho ni itthu, ni khwira, “Muluku nyuwo anawoothe muniiraanyu ntoko munoomurumeela, Muluku yoowo mmosaru onimooopwetexani.” Nyuwo munuupuwela wira owo aamphwanya mukhaliheryo? Huh! Owo khwira. . . Oh, wulu! Owo, mwehererye ni yoowo olelo moone khama aamukhalana. Nnari. Masi owo exeeni? Owo ti mweettelo wa profeta eekeekhai. Owo aahikhalana Masu. Owo aanisuwela yaari exeeni Iyo.

Ntoko Mikaya a khalayi. . .

²⁶² Ttutthu mukhaani onvaherenryaka, koovira etthu ya yeeyo, minuutu vakhani sivinre, okhala wira kinuurela okathi.

²⁶³ Masi, Mikaya, okathi owo weemenlyaawe ohoodo wa Akhabi, owo aahaaweha. Owo aanisuwela Masu. Mikaya aahaahimeerya Masu. Mwaha wa xeeni? Mikaya aahilamula yoowoona awe, Mwixuttiho awe, ni Masu a Muluku. Ni owo aahoona wira Mwixuttiho awe ni Masu yaari emosaru. Okhala wira, Masu yaahimye wira Owo aammutakhaliha Akhabi, ni wira aanwiiriha alapwa olata ephome awe. Ti yeeyo Masu yaahimye aya.

²⁶⁴ Vano, Mikaya aahikhalana yoowoona. Ti yeeyo, owo aari profeta. “Kinimoona moota Masu anrwaaya wa miyo.” Vano owo

khuvekela, “O Pwiya Muluku, kiireke exeeni? Kihimeerye exeeni nikhuru nla n’alaleyi yeemenle va? Va siri mitthenkeso sothene. Othene mmuttettheni aathukumana akivirikanyaka, Pwiya. Va miyo keemenle ohoolo wa mwene. Kiireke exeeni?”

²⁶⁵ Vano owo khukela mwa yoowoona. Khwira, “Welakani. Rowakani.” Khwira, “Masi koomoona Isarayeli omwaramwareiye ntoko ipwittipwitthi shirina makhampusi.” Ayo.

²⁶⁶ Ole—humu ole a etistritu khwaattama khunvaha nlaathuma owanoni, khwira, “Masu a Muluku, Erooho ya Muluku, eronwe yayi, okathi Eyo ekhumme aya mwa miyo?” Mwa yoowo?

²⁶⁷ Moosuwela etthu Muluku aahimme awe? Owo aaroomutthuniherya xetwani orowa, okela eriyari aya, okhala wira awo yaahihya Masu, opacerya wene.

²⁶⁸ Bibilia ohimnye wira, “Awo khayaamini Masu, Owo aamwaavaha oweriwa wo wootha, wira yaaminiki etthu yoowootha, ni ahukhummwe ni yeeyo.” Vekeekhai ti yeeyo mitthenkeso iya ni atthu a elapo ela aniiraaya olelo, yaaminiki etthu yoowootha, wira ehukhummwe ni yeeyo. “Okhala wira khanivo hata Nsina nikina nivaheriwe vathi v’Erimu mwa nenlo mukhanly’anyu woopowaka.” Mukhale muliinyani, sa mitthenkeso, siiso. Ayo.

²⁶⁹ Vano, exeeni ala akina...?..Maprofeta ala akina yaawehaaya? Awo yaari maprofeta. Ayo, mulopwana. Awo yaari maprofeta. Masi vaakhanle wira yaaheemela khuweha oprofeta aya ni Masu!

²⁷⁰ Vaakhanle wira aMetotista yaamweemela olelo n’utthokelela oprofeta aya, awo khayaakhalakhala emutathelaka mutthu mukina. Awo yaamwaakhela Erooho Yoowaarya. Awo yaamwaapatisa atthu othene yaapwinihaka, mwa Nsina na Yesu Kristu. Vaakhanle wira Asempeleya a Muluku yaamweemela olelo awehe oprofeta aya, awo yaamutthikela Masu. Vaakhanle wira aUnisista, olelo, yaamweemela khutthokelela oprofeta aya, awo yaamutthikela Masu.

²⁷¹ Masi, moone, vaakhanle wira maprofeta ale yaaheemela ni yaahitthokelela oprofeta aya! Awo yaarimwaanyiherya. Awo yiirale, “Eyo ti yawihu. Vano hiyo ninrowa owela oRamothi w’oGalaadi ni ninookuxa, okhala wira ti wawihu. Yoxuwa t’onivanhe.”

Masi Mikaya khwira, “Eyo eniweya vootthokeleleya.”

²⁷² Masi ti yeeyo. Nyuwo khamunthuna waanyiherya. Nyuwo munthuna waamini etthu Muluku ohimaly’awe. Muhaanyiherye etthu.

²⁷³ Ankhi Abrahamu aanyihenrye? Aarowa ohiya sayi muttethe awe? Owo aarowa okhalana sayi miyaakha emiya, nlelo

amuttottopelaka Muluku, wira yaamurowa okhalanasa mwaana ni Saara, ni owo miloko mithanu na mixexe?

Muhiye waanyiherya. Mwaamini paahi.

²⁷⁴ Nyuwo munoomutthuniherya xetwani wooleelani, “Moosuwela, Munna Branham kahiyo hat’etthu woohikhala namirima miili.”

²⁷⁵ “Vano, miyo vano kinoolipelela, koone sinto ti yoowo. Nrowe noone khama owo onniixuttiha oratteene. Mukihiye kitthikele mBibiliani.” Muhi, muhirowe...Owo khonrowa wootthuniheryani wira eyo. Nnari, nnari. Munnona?

²⁷⁶ Masi owo onoohimya etthu yootakhala ya miyo, yeeyo khino aarowaawe okhalanaka ehakhi yo wira vano nyuwo munootthikela mwaakhelaka yeeyo, munimweemela ni opacerya waanyiherya, “Ayo. Owo khaarina wira iirale-ene *yeela*. Owo khaarowa wira iirale-ene *ele*.” Nyuwo munoopacerya okiweha, ahe, nyuwo khamureerane sowaatta.

²⁷⁷ Nto mwaamuwerya wira munwenhe Pwiya Yesu. Munoochwanya sinci-ene. Nkanweheni Yoowo, minuutu mmosa paahi. Kinrowa ohimya wira khula mmosa a nyuwo murumeyi. Vano ninrowa oliyala wira Owo ootoko okhala elapo ya vathi. Va ori Mmiravo ooniheriwe, elapo yothene, wira Owo ti mwa—Mwaana ooraruwa. Ame awe yaahikhalana Owo awo ni atithi Awe ahinatthi othelana. Ehooniheriwa. (Vano, awo khanrowela Masu, “Mwali harus i onoorupala.”) Awo anttharelela paahi ele aniiwaaya, moone, “Mwaana ooraruwa.” Awo khayaamuhimenrye wira Owo aayariwe mutampini, ni aaphavela owiixuttiha? Miyo ka...Munnona?

²⁷⁸ Nto nkawehani etthu Owo iiraawe. Owo vekeekhai aakhaliha kapatti-kapatti khula ekereja yaakhanle mulaponi. Eyo yaahilikana? Mitthenkeso, itthu sothene sikina.

²⁷⁹ Owo aari exeeni? “Mmiravo mmosa oowunnuwaxa paahi eettesaka siiso, Mmiravo, hata muromolelo. Mukileele ekereja xeeni Nyuwo muniiraanyu mpantta. Taani akhanle atiithi Anyu? Nyuwo muniira wira Yosefe kahiyo tiithi Anyu?”

“Yosefe kahiyo tiithi Aka,” Owo aamuhimya.

“Ahe, taani akhanle Atithi Anyu?”

“Muluku ti Tithi Aka.”

²⁸⁰ “Ahe, Nyuwo namathipelela! Eyo vekeekhai t’ile Nyuwo mukhanlyanyu. Nyuwo, muryeene Mutthu, munihimya wira Muluku ti Tithi Anyu?”

²⁸¹ Vaakhanle wira yaahiwehaweha ni Masu! Aleluya. Khamunona yeeyo? Masu yaahaana wiipaka erutthu. Awo khiyaawehale yoowoona aya ni Masu. Yaari yeeyo.

²⁸² Ti yeeyo eniireya olelo. Khamuniweha soowoona sanyu ni e...yawinyu—yoolaleerya anyu ya oprofeta ni mwiixuttiho

anyu, ni Masu a Muluku. Mutthu omphavela wooleelani Ekeekhai, vano nyuwo munoonanariwa ni yaawo, siiso ntoko Amosi aarowaawe wira, siiralyaawe Amosi. Nyuwo muniira etthu emosaru.

²⁸³ Vano nkawehani va. Owo ori mwa mukhalelo ola. Vano, nyuwo mwaammuulumela Owo, khino, eyo ekeekhai, vaakhanle wira khimwaarowa otthikela Masu. Awo aniira yeeyo. Awo anoomuulumela Owo olelo.

²⁸⁴ Ankhi nyuwo athiyana, *va ni va*, ayo, xeeni ohitthokelelaka soowuupuwela sanyu sa maihi anyu oometthiwa ni Masu, nto moona etthu Awo anihimyaya? Munnona? Xeeni nyuwo ohiiraka itthu iyo?

²⁸⁵ Xeeni ohiwehaka opatiiso anyu, wa “Tiithi, Mwaana, Erooho Yoowaarya,” “oraaru,” woowootha oniitthaniwa siiso, yeeyo ehikhanle etthu ekina woohikhala mitoko miraru sa Muluku mmosa, itititulu? Hata *nsina* na “Tiithi.” Khekhhanle etthu iyo ntoko *nsina*, “Tiithi, Mwaana, ni Erooho Yoowaarya.”

²⁸⁶ Nsina n’Atiithi, Mwaana, ni Erooho Yoowaarya, okhanle, “Pwiya Yesu Kristu.” Nwehe opatiiso anyu ni enamuna othene yaapatisiwaaya mBibiliani. Mwaatthokelela muupuwelo anyu ni Masu, nyuwo—nyuwo mwaamutthika mpatisiwe ni Nsina na “Pwiya Yesu Kristu.”

²⁸⁷ Ti yeeyo Paulo aahimenry’awe wira yiire. Ni khwira, “Aakhanle mutthu mukina aarowa wiixuttiha etthu ekina, ata—atakhalaiwe, hata wira Nlaikha naarowa okhuruwa.”

²⁸⁸ Moosuwela, imaara sinci-ene, Malaikha annikhuruwa. Eyi, moota aPentekosite ammiryaaya eyo!

²⁸⁹ Ankhi okathi Martin Oowaarya eemenlyaawe vale, nto ohoolo wawe khweemela ookhala ole muulupale aaryaka?

²⁹⁰ Mutthu aapatisaka ni Nsina na Yesu, yoowo aamini Erooho Yoowaarya, ni eettela Masu! Vano aRooma khumoomola, ni khumwiiriha sothene, ephavelaka onvaha makano aya ni miixuttiho soopakiwa ni mutthu. Mulopwan’owo eemerenrye Masu.

²⁹¹ Nihiku nimosa, mwa owerya wawe, axetwani yaanirwa wa yoowo ni weererya olavula ni yoowo. Owo khaacaliwa ni yaawo.

²⁹² Nihiku nimosa, Satana khurwa siiso, ntoko Kristu, owarihiwe ekhara, owanre isapatiilya sa weero, khweemela vale khwira, “Muhi...” Malumi a mooro amurukurenrye. Khwira, “Khamunkisuwela, Martin? Miyo k’Apwiya anyu. Mukikokhorele.”

Martin khunweha. “Yookhala etthu evonyeiye vo.”

²⁹³ Owo khwira, “Martin, khamunwerya okisuwela?” Khwira, “Miyo ka Pwiya anyu ni Moopoli.” Khwira, “Mukikokhorele.” Owo khuhimya yeeyo imaara tthaaru.

294 Vano Martin khuwehaweha. Owo aahisuwela, wira Kristu onrowa owarihiwa ekhara n'atthu Awe, Orwaaka. Owo khaarowa owara isapatiiya sa weero. Owo khwira, "Mukhume wa miyo, Satana."

Eyi, aPentekosite khiyaarowa omirya eyo? "Eyi, Nlaikha naaryaka!"

295 Muthiyan'owo aarwiiye, okhuma Ochicago weiwo onrowaaka, khwira, "Munna Branham, arumeyi iwe ahimye wira vakhala wira Nlaikha n'Apwiya nooleeneni wira mpatiseke ni Nsina na Yesu, awo yaamukupali. Masi owo muupuwelo anyu yeenyu?"

296 Miyo khwira, "Nlaikha n'Apwiya naahimye-ru etthu p'itthu yoovirikana ni Yeeyo, nlo khinaarowa okhala Nlaikha n'Apwiya." Munnona?

297 Nakhala Nlaikha ninihimya etthu p'itthu eri yoovirikana ni Masu *ala*, ekhale yoowoothiwa. Ni mutthu oohimeeryani wira, namitthaka a Muluku, onihimya wira t'a Muluku, ni onooleelani wira, "Ti yoolikana opatisiwa, nsina na 'Tithi, Mwaana, Eroho Yoowaarya," akhale nawoothe.

298 Mutthu ooleelani-ru wira, "Ti yoolikana nyuwo, okhalana maihi oometthiwa, ni itthu ntoko seiyo; wira mwaahaana owara exapheyo mukereja, exapheyo, 'okhala ekhuneelo," akhale nawoothe.

299 Masu a Muluku, ti Ekeekhai. Khula emosa wa itthu iya sikhanel soovirikanya Masu, ekhale yoowoothiwa. Ti Masu, ti Ekeekhai. Awo anoorkhala.

300 Mwaha wa yeeyo Mikaya aaweryaawe osuwela wira oprofeta awe waakhumme wa Muluku, okhala wira waari ni Masu a Muluku. Ayo, mulopwana. Yoowoona awe yaanilikana oratteene ni Masu a Muluku.

301 Oh, vaakhanle wira Amosi aari vaava, owo aamukhala ni Masu. Eyo ekeekhaii. Masi, moone, ole okhanle mulattu olelo, ni hiyo, eri ntoko waaryaaya ni yaawo. Kinihalela omaliha. Mulattu ni hiyo ori ntoko waaryaaya ni awo. Awo yaarooxuttihiwa, woohikhala Mulipiheryo. Yesu ohimye wira, "Nyuwu mookhaliha Masu a Muluku ohikhalana efayita mwaha wa ilimalelo sanyu." Ni opatiiso uwo woowootha! Ethoonyeryo eyo yoowootha yo waakhela Eroho Yoowaarya! Akina w'awo yiirale, "Ovahana ntata." Akina aya aniira, "Olavula ilavulelo." Miyo koowiwa axetwani elavulaka ilavulelo, ni ovahana matata, nave. Ayo, mulopwana. Kahiyo ethoonyeryo ya Yeeyo. Vano, itthu iya sothene siiso, itthu iyo sothene, moone, nyuwu munookhuma mwa Masu a Muluku wira mwiixuttihe ilimalelo iyo. Ti yeeyo.

Vano, owo aamwiira, owo aahaana woohokoloxeryani Mmasuni.

302 Masi hiyo nihaana, alipa-oowixuttiha ahu olelo, aawixuttiha atthu, vovirikana ni Mulipiheryo wa Masu a Muluku. Vano nwiriyane oratteene.

303 Ti yeeyo awo yiiraly'aya wu. Ti yeeyo Amosi aahimeeryaawe. "Muluku munihimyanu omusuwela, Ti Yoowo onrowa woopwetexani."

304 Vano, hiyo niniwixuttiha, vovirikana ni (exeeni?) Mulipiheryo wa "Waamini waatonko ovahiwa axitiithi apentekosite," ayo, Bibilia. Yiixuttihale epurkatooriyu yoowoothiwa! Yiixuttihale opatiiso wowoothiwa! Sothene, soowoothiwa, soowoothiwa, soowoothiwa, evalaanaka ni Yoopacerya.

305 Nyuwo khamunaamini? Mutthikele mBibiliani, nto mukuxe "epurkatooriyu anyu," ni mukuxe "Tithi anyu, Mwaana, Erooho Yoowaarya," ni "otathela," ni itthu sothene iyo, ni mutthike moone yaakhanle-ene ya Yoolempwa. Eyo t'inamuna. Musuwele vakhala wira eri Vamulipiheryoni. Munnona? Iyo siri ota wa Mulipiheryo.

306 Yeeyo, Paulo ohimmy'awe wira . . .Bibilia—Bibilia onihimya wira e—e . . .wira, "Ekereja ya Muluku elipiheriwe vasulu va Mwixuttiho w'arummwa ni maprofeta." Maprofeta ni arummwa ahaana okhala emosaru. Vekeekhai.

307 Exeeni? Hiyo nirookhuma Vamulipiheryoni wa Masu, mpakha milipiheryo sa miromolelo.

308 Nwiriyane vano. Kinoomaliha. Nware ekaruma anyu yo wiiwa wa muroohoni. Nwiriyane.

309 Hiyo niroohiya Mulipiheryo wa Masu, nto niri vasulu va mulipiheryo wa muromolelo. Okathi xeeni kaakhanly'aka okhalaka mwa yeeyo? Iwoora tthaaru sikina. Oohiya Mulipiheryo wa Masu, okela mulipiheryo wa s'opuha sa molumwenkuni, itthu sa molumwenkuni, ohureya okelaka mukereja. Oohiya Masu, khukelela iyaaminelo. Eyo yaamukikuxa isumana tthaaru wira kilaleye yeeyo, nuusu, moolumo awo maxexe vaavale vale. Oohiya Masu, khukelela muromolelo, masu a muromolelo. Emalakaru e—ekereja wiromola, eyo yoohiya Masu vaavo vo.

310 Khenihala etthu ekina. Woohikhala otthikela vaavo vakhumme aya, n'urowa-tho. Otthikela Masu. Ti yeeyo. *Orukunxa murima* enihimya "orowa, orukunuwa, erukunuwelo." Munrowa ephiro yoohiloka. Vaareera.

311 Muromolelo wa opuha. Muromolelo wa- . . .Mu—Mulipiheryo, kinihimya, wa—wa soopuha, mulipiheryo wa itthu sa molumwenkuni, mulipiheryo wa iyaaminelo. Ni sothene iyo, vamosa, sookumiherya ohureya woopahuwa, opahuwa wa muroohoni.

312 Owo oryeene profeta eekeekhai, aamoona mwa hiyo voolikana etthu owo oonne-awe mwa awo. Owo eemenle va vaplataforma olelo va, ni miyo kaamwiira, “Munna Amosi, profeta muulupale a Muluku, nyuwo muhinoova, rwaani va mukhale voopuroni vaka,” owo aamulaleya Masu ala. Owo aahaana wira. Owo profetaa. Vaareera. Owo aamulaleya voolikana siiso ntoko alempwaly’aya, voolikana ele enihimy’ahu naanaano va. Vaareera. Owo aamukhala, aamoona etthu ononaawe mwa hiyo, emorelo ya olakeya.

313 Nwehe paahi, apatthani. Akavi va, ekerej’ela eri va naanaano, anona wira olumwenku ori mwa emorelo wa olakeya? [Muthukumano oniira, “Amen.”—Mol.] Vano, hiyo noosuwela wira t’oryaaya. Mulattu ene xeeni? Oroohiya Masu. Khweeli. Vaareera.

314 Amosi khaamuhimyanne mulattu kuveerunu. Moonweha va, mwasomaru muronwe-ene owaani? Owo khaamuhimyanne mulattu kuveerunu, owo aahimyanne mulattu ekereja mwaha wo omuthanla kuveerunu uwo. Hum!

315 Nyuwo anapoliitika, mukitthuniherye kiihiye eyo ekele mwa nyuwo vakhani, va ni mulaponi, weiwo enrowaaya. Ekereja yaathanlale etthu ntoko Yeropowamu. Kinnikoha vakhala wira nyuwo, hiyo, khaniirale etthu emosaru? Nrowe nihimye wira kuveerunu ooreerela; kuveerunu khokhanle otekaka empa vamwala atthu athanlaka empa vamuthaakani. Ti siiso? Muhihimyeke wira, “Kuveerunu ahu! Kuveerunu ahu!” Ti nyuwo, elapo. Ti atthu. Ninwerya sayi hiyo. . .

316 Murumeyi mmosa aahikiirela, khwira, “Munna Branham,” khwira, “nwehe. Miyo koosuwela wira mookhalana exariya mwa Yeeyo. Masi,” khwira, “vaakhanle wira kaamulaleya Yeeyo, muromolelo aka waamukoomola, atthu aka yaamukikumiha mukereja.” Khwira, “Miyo nkaakhalakhala kilaleyaka mutthaka mukina.”

Miyo khwira, “Mulaleye Yeeyo, khula enamuna.” Ayo, mulopwana.

317 Awo Masu a Muluku. Nyuwo munimwaakhula. Mwaari profeta a Muluku, eekeekhai, munookhala ni Masu. Vaahikhale siiso, munookhala ni muromolelo anyu. Vantthariha vatthu munikhumaanyu.

318 Nkawehani. Nnari, mulopwana. Khanikhanle otekaka, kuveerunu khokhanle otekaka empa Vamwala voolipa atthu athanlaka empa ya opuha vamithaakani sinkomowa.

319 Nkawehani etthu entthunaahu. Nrowe nikuxe minuutu mmosa paahi vano. Kinroromela wira nkiniwooceihani. [Muthukumano oniira, “Nnari.”—Mol.] Masi nrowe niwehe etthu entthunaahu, minuutu mmosa paahi. Nkikhanle ohiyaka ohimya nuulumo nla. Nwehe etthu entthunaahu.

320 Nkawehani etelevisawu ahu. Ti yeeyo hiyo entthunaahu. Hiyo ninaatthuna amosa-amosa wa anamatheiha ala aneemela nno ni ohimya inamuna sothene sa iperwa soonanara, ni hiyo ninkhala owaani ohiya orowa omuthukumanoni wa mavekelo Namararu ohiyu, wala mulaleyi ohiya okhuma voowaakuva wira nwerwe orowa moone; namuttompe oohureya, oottakatta, ootheliwa, vaara vathanu wala vathanu na mosa, ahimiyaka iperwa soonanara, aiwarinhe-ene veekhapa, ni aiseettihaka ntoko sothene. Ni nyuwo muniphentaxa yeeyo ovikana simpheentaanyu empa ya Muluku, eyo ennooniherya muthinto xeeni wa erooho ori mwa nyuwo.

321 Hiyo ninootthuniherya. Hiyo, atthu, vaakhanle wira atthu a elapo ela yaammulepela ipaphelo kuveerunu ahu, nihimye wira saamukhala ipaphelo emilyawu emiya soophiya wa kuveerunu owo, “Sihiihiwe iprokarama iyo soonanara,” awo yaahaana wira. Hiyo n’atthu. Masi hiyo, atthu, ninthuna soonanara, tivo ti yeeyo enaakhelaahu.

322 Nkawehani iprokarama sa muraatiyuni. Oh, wulu! Sinrukunxa *Mwala Wa Okathi* okhala twist. Uh-huh. *Mwiikimanyo Wa Khalayi Woowoma* okhala swing, rock-and-roll mwa yoowo. *Mwiikimanyo Wa Khalayi Woowoma*, ayo, mmaraatiyuni mwahu, televisawu. Sothene. . . Arookuxa nno, woohikhala khalayi, matheko awo, axiruusi awo. Sothene soohifayi ntoko sinwery’aya ophiyerya okhala, ti yeeyo ennisivela hiyo.

323 Enikhaliheriwa n’ani? Saravexa, wiskhi, asikaro, musurukhu wa elapo. Awo aniira exeeni? Ankuxa musurukhu aya wa mpoosito, waarina orowaka wa kuveerunu wa mipoosito, ni oliva eprokrama ya mutelevisawuni yoonanara awo ankhaliheryaaya.

324 aPentekosite khalayi khayaakelaka musineemani iye soonanara, soohifayi okathi sooniheeriwakaaya ilarataro iyo. Xetwani khuhela emosa wa nyuwo, khuhela etelevisawu mpaani mwanyu.

325 Mweettelo wa profeta eekeekhai ti woolipa saana, masi nrowe nikhale ni Ekeekhai. Ayo, mulopwana.

326 Nkawehani mapawe ahu oolaleya. Athiyana yeemenle, ni asikaro mmatatani mwaya, khula Yesapeli mwaamukhani mulaponi. Miyo kaahirowa o . . .

327 Nihiku nlo, kaahoonna etthu yootikiniha. Khaakhanle muthiyana mmosa kaaronwe aka oxikola iwe, wira kaakuxe anamwane, okathi waaronwaaka waakuxa, ahaanwanre kaputtula; ni, mwa, mukhalelo w’okathi woooriya. Khula mmosa a awo ni sikaro. Ephiyakaru vale khweemela, yahaakhalanne sikaro, yaamumpattiha naanaanoru, nto, “Whish! Munnoonna moota siryaaka saana?” Yookolelaka ntata

nle vamukhora, *sa*, ni sikaro mmatatani mwawe. Nto nyuwo mwahimya etthu, oh, awo anoophutuwa. Vekeekhai.

³²⁸ Muhimye etthu ya Ricky wala Elvis, wala mmosa a yaawo iwe, awo yaamuwoopelani. Ni kuveerunu amwaakhaliherya, okhala wira awo amiravo paahi. “Oh, eyo eri saana. Awo, awo khasuwenle saana. Awo aximiravo. Mwaaliyale.”

Vano munnoona etthu enihimya profeta eekeekhai, mweettelo awe?

³²⁹ Nkaaweheni anamaloha ala oohureya mukereja, ni muromolelo aya, awo yaamuwoopelani ottuli. Etthu emosa paahi enaakhottiherya wira yiire yeeyo, omoriwa ikharari wa Muluku, mpakha Mutthaka okhume. Xetwani aamuwiivani, vaakhanle wira aamuwerya wira. Khweeli. Masi Mutthaka ohaana orowa. “Miyo Apwiya kinoohokoloxa.” Ti yeeyo. “Kinniwerya ni maluku ala waavenxa.” Ti yeeyo. Vaareera.

³³⁰ Isineema sahu, ni mapawe a olaleya, anatampi ahu oosiveliwa s’opuha aniisiihana aKristu. Atthu emosa paahi aKristu; oosiveliwa opuha, oophavela sa ithaama. Athiyana, oowara voohifayi; alopwana yaawehaka, awoopelaka nturi, aniisiihana aKristu, akhumaka. Vano, awo hata aakhalana—awo aakhalanasa. . .

³³¹ Eyo etthu yuulupale oFlorida, California, wira arina ikulupi suulupale vano. Alopwana othene anoothukumana khuhela ihulelo saya, nto athiyana anoovolowa mme ni okuxa emosa wa ihulelo vale. Nto onakhaleru pani, onimuroiha “mwaar’awe” owaani. Awo anookhala esumana emosa, vano n’utthika, otakaiha-tho ihulelo. Munnona? Ikulupi. Aana ooyariwa mooraruwani ni itthu sothene, ekuluwe enikhuura ekuluwe, mwalapwa onimukhuura mwalapwa. Exeeni eniiraneya? Okhala wira awo aroohiya Masu.

³³² Awo khansuwela ele enihimya ephwanelelo. Aneetta nno, ni ivistiitu sikhaani sootita, ni itthu siiso, ni alopwana yaakhalelaka ithaama, ni wuupuwela wira t’olakeya. Khino pooti muhinre etthu yoonanara, murokor’aka, masi mukihye kooleleni etthu, nyuwo mwa ekaruma ya xetwani. Ni Opwaro wo Olamuliwa, SIISO ANIHIMYA T’APWIYA, munoorowa waakhula mwaha w’oraruwa, ni munep’anyu onoopweteya. Nyuwo munnisuwela etthu yo wira. Nyuwo munnisuwela vano, khula enamuna. Khweeli.

³³³ Mukhalelo ahu wothene ti wootakhala ni woopahuwa. Ti atthu ahu, etthu awo antthunaaya. Ntoko mulopwana ooreera murima a vathokoni, ahe, mulopwana aakhanle mulopwana ooreerela a vathokoni, khuyamuhimyana mulattu kuveerunu anyu. . .Ti yeeyo enaaroiha amiravo ahu nno ni waakhaliha malaxi wira epahiwe, khweeli, mwaha wa epahuwelo ahu yoohi. Naaphenta Apwiya ni waarumeela Apwiya, ni naamuthanlale enamuna yooreera ya kuveerunu ni itthu sothene sikina,

naarowa okhala nipuro nooreeraxa. Ti yeeyo. Khinaarowa okhalana ikhotto. Nnari. Muluku ti ntthyawelo nahu ni ikuru. Anooroihiwa amiravo ahu wu ni wiiwiwa, ni othikilasiwa, ni sothene sikina, okhala wira mwiirelo ahu t'okhumelelinhe. Muluku ohimnye siiso, mBibiliani, ni Owo khonrukunuwa. Owo mmosaru paahi. Iwo otthuna w'atthu aneene.

³³⁴ Ntoko mulopwana ooreerela a vatthokoni, anghi owo akhala mulopwana ooreerela? Owo onotthuna wira etthu yooreera. Owo onthuna amukhaleleke Muluku. Nave orina amusi oosiveliwa ni s'opuha, oohifayi. Mulopwan'owo onrowa wira exeeni, anwaar'awe etthunaka waawara akaputtula, ni owara ikuwo soowooniherya okhapa, ni okhuma ni wira ntoko Yesapeli, an'awe axithiyana ni an'awe othene, ni othene aya? Atithi awe... Mwan'awe mwaamulopwana omulenlyaawe, ni omphentalyawe, omukunxaawe ni ompecari, omuhenlyawe voolilini, khunvekelela, onvenya, wira, "Mulopwana Aka mutokwene oovahuwa. Sothene owo onupuwelaawe ti sa Bibilia." Exeeni mulopwan'owo okhanlyawe wiiraka ni amusi awe?

³³⁵ Eyo etthu emosaru mwa kuveerunu ahu, mwaha wa atthu awe va. Muhimootheryeke kuveerunu. Muhimyaneke mulattu nikhuru nla na ikereja soothikela ottuli, mwaha w'ohela ithu iyo muhina mwa ipoliitika saya, ntoko sirinaaya. Awo anthuna yeeyo. Mwaha wa yeeyo awo athanlale aya yeeyo, ni mwaha wa yeeyo awo arinaaya. Ni mwaha wa yeeyo ehukhumu ya Muluku eryaaya mwa yaawo. Ni awo anrowa ohepha ele enaalaaya. Awo animwaala vano, ni anoorowa ohepha ohoolo waya. Nwehe. Oh! Hiyo noovahuwa. Oh, ayo.

³³⁶ Niphavelaka othuma ni musurukhu evolowelo ahu oRussia. Niphavelaka othuma ni musurukhu evolowelo ahu mukomunismuni. Niphavelaka. Vano, musurukhu, khimukhanle othumaka soovaha iya sa Muluku. Aahikhala mmiravo mmosa, Simoni, eererya wira yeeyo nihiku nimosa, nto Petru khwira, "Mpweteye nyuwo ni musurukhu anyu." Hiyo ninvara mpantte wa Simoni namaxintta, neereryaka othuma yoovaha ya Muluku.

³³⁷ Mutthikele Masu. Mutthikele wa Muluku. Mutthikele wa Kristu. Vano muhivela-vele mwaha wa komunismu. Ni mwaathanle ninoomuhela mutthu oophwanelela. Ninookhalana mulopwana mukina ntoko Abraham Lincoln, George Washington, mutthu aari mutthu eekeekhai. Muhimootherye kuveerunu iwe. Niihimyane mulattu yoohi. Ti yeeyo Amosi aarowaawe ohimya. Ni ti yeeyo khula profeta eekeekhai a Muluku aarowaawe ohimya, vakhala wira onnisuwela Masu a Muluku. Owo aari profeta eekeekhai, owo—owo onnisuwela Masu, okhala wira Awo animurweela yoowo.

³³⁸ Isarayeli, moovarihanani mwaya ni—ni nwanani aya. Yoopacerya, awo yaahaana ohiya Masu a Muluku, ehinatthi

owerya ovarihana ni nwanani aya.

³³⁹ Ni nihinatthi owerya ophiyerya ovarihana ni awanan'ihu n'itthu siiso, nihaana okhuma mwa Masu a Muluku. Uh-huh. Etthu emosaru vano, nimutthuniheryaka Rooma oxintta. Vano, hiyo niniira yeeyo, okathi wothene. Owo oomukuxa kuveerunu. Owo onkuxa mapuro. Owo ohaakuxa atthu. Vano owo onkuxa ikereja.

³⁴⁰ Hiyo niniira exeeni? Ninkhala oomaala, nikhhalaka oowiiraana ni yaawo. "Oh, khivanvirikana vakhala wira enamuna *ela* wala enamuna *ele*. Yothene Muluku, khula enamuna." Nyuwo anamuhaawi, othoiwa, ootthikela ottuli muniitthaniwa maprofeta. Exeeni eniwiirani? Awo khansuwela Masu a Muluku mwa itthu iya. Awo khansoma Masu. Awo khansuwela. Awo aniira wira komunismu onoorowa oxintta olumwenku. Nnari, kahi siiso.

³⁴¹ Romanismu onrowa okuxa olumwenku, ni oniira siiso ni nsina na oKristu. Bibilia khohimnye, wira Yesu oohimya wira, "Yaarowa okhala oolattanaxa, mpakha yaarowaaya owoototha ale Oothanliwa, vaakhanle wira vaaniweryaneya"?

³⁴² Etthu entthunaahu olelo. . . Mukihiye kimalihe, kihimiyaka ela. Vano miyo kinrowa omaliha. Ele entthunaahu olelo profeta mukina eekeekhai. Amen. Hiyo nimmutthuna mutthu animurweela Masu a Muluku. Ayo, munna. Owo aamukhoottiwa ni otthyaiwa, ni woomoliwa, masi vekeekhai owo aamphutula ni aamukumiha mwiithe. Owo, owo. . . Ayo, uh-huh. Owo vekeekhai aamwaala Ipyo mpakha ale Oothanliwa yaarowaaya ophwanya. Uh-huh. Eyo ekeekhai. Hiyo ninnimutthuna profeta. Hiyo nimmutthuna mutthu onimurweela otaphuleliwa w'ekeekhai wa Masu, Muluku onlavulaawe ovira mwa yoowo ni olipiherya Masu, wira akhalihe Awo ekeekhai. Ti yeeyo entthunaahu. Nto, munna, hiyo noolaiheriwa mmosa, voolikana ni Malakhiya 4, "Wira ahokoloxe." Exeeni? "Waamini w'atthu, otthikela mBibiliani." Hiyo noolaiheriwa mmosa. Owo onimwiira.

³⁴³ Amosi aanisuwela. Ayo, mulopwana. Amosi aanisuwela, Isarayeli, anamaaphenta aya ootakhala voohilekela yaamwaapwetexa.

³⁴⁴ Ni anamaaphenta aya ootakhala olelo animweepwetexa vahilekenle, iyaaminelo seiyo sa muromolelo ni itthu yitthukenlyaya-mo. Nyuwo aPentekosite, eyo t'itthu enrowa woopwetexani, eyaaminelo anyu ni muromolelo. Nyuwo munimwiitthuka iwo, wira mwaakhele ekanyeryo ya nxeni, ni hata khamunsuwela, mwiipurulelaka yeeyo mmaithoni mwanu. Vekeekhai. Eyo ekhottiheryo. Mumphavela wira exeeni? "Muniira mpantta wa *yeela*, wala khamuniira mpantta." Munnona? Mulipelele paahi, mulipelele vakhani paahi, okathi vakhani paahi. Vano, nyuwo muniira, "Miyo kinookhuma-mo

nto.” Nnari, khamunrowa okhuma. Nyuwo moomala okhala-mo. Nyuwo mootthitiwa. Moovariwa ni ekanyeryo mwa nyuwo.

345 Hata wira, Esawu aahinla vooriipiha-vo murima, okathi osuwenlyawe. Masi owo aahinla vooriipiha-vo murima, aphavelaka ophwanya nipuro wira arukunxe murima, nave khaawenrye ophwanya. Munookhala vaavo nto. Vano ola p’ukathi wo otthyawa.

346 Amosi aanisuwela wira anamaaphenta aya ootakhala yaamumpwetexa vahilekenle, maana awo, ekereja, yaahimuhiya Owo, Muluku ni Masu Awe, enamuna eyo ya Ekumi. Awo yahiihuluxa enamuna ya Ekumi ya Muluku, khupaka yawaya yaawo. Oh, Masu yaari nluku nookwattula w’awo.

347 Nto Eyo etthu emosaru olelo. Masu a Muluku ti nluku nookwattula w’ale aniitthaniwa aKristu. Mmuleele sa opatiiso mmaasini ni Nsina na Yesu Kristu. Mmuleele sa Muluku oowaarya. Eyo enoopaka . . .

Nto, ahe, eniriwa, “Ahe, hiyo nookhalana Erooho Yoowaarya.”

348 Vano xeeni nlelo okhalanaka maihi oometthiwa? Xeeni nlelo opatisaka ni nsina “n’Atithi, Mwaana, Erooho Yoowaarya”? Xeeni nyuwo nlelo waaminiki itthu iya sikina nyuwo munaamini anyu, ni wiiraka ntoko siniiraanyu? Eyo ennooniherya. Mihokorokho sanyu sinnooniherya. Yesu ohimnye wira, “Ni mihokorokho saya, munimwaasuwela.” Ayo. Munnona? Eyo enimooniherya paahi, wira munihimya etthu muhinsuwelaanyu hat’etthu ya yeeyo. Ayo, mulopwana. Ayo.

349 Amosi aakhanle vaava, owo aamukhuwelela iyeettihelo saya. Mwaanisuwela eyo?

350 Vano kinrowa osoma eversiiikulu emosa nihinatthi omaliha, versiiikulu 8 ya kapiitulu 3. Nto nrowe nisome.

*Mwatto iipaka taani ohinoova? Apwiya . . .aalavula,
taani ani ehilaleye?*

351 Nwiriyaane. Kimalihaka vano, kintthuna kihimye ela. Kileveleliwe woopisihani, ewoora nuusu voolekela. Masi, nwehe. Kintthuna kihimye ela. Miyo ka mulipa-ooxaya. Miyo kinnixaya. Miyo kinnitteeliwa murima Muluku okivaha etthu siiso.

352 Nihiku nlo okathi kapwitthi aarumme awe, miyo kitthikela vale, wira koone khama kaamuwerya omoopa-tho. Nkintthuna wira eyo ekitutuxe. Yaakiphwannye-ru ehasara, muramphani, nkaarowa ohiya weettiha ekaaro. Vaakhanle wira kaamweetta kikwattula ekatha aka vatapetini, kikhuma kiviraka vacanelani, nkaarowa ohiya wetta. Munnona? Nnari, nnari. Muluku okivanhe exuttelo yooreera. Owo aari Satana. Owo khaari Muluku. Munnona? Owo aari Satana.

353 Vano, kinnisuwela elikanyiheryo ya muroohoni ya yeeyo. Niri araru a hiyo mpaani mu naanaano va, ansuwela exeeni iyo. Vano eyo yaanvenxa maihi mmuruni mwanu, masi nkaarowa omuleela hata mutthu. Munnona? Atthu yaala araru paahi, wira elipiherye. Vano, sothene siri saana. Sothene. . . Muluku aanisuwela yothene eyo, ni aahilopola khalayi ene, ni itthu sothene sikina. Ni hiyo noosuwela. Iwo waari ovonya waka mwa epantte emosa, ni kaahikhalana etthu.

354 Miyo—miyo kaahimwaakiherya mulopwana mmosa emaara emosa, nave vahaatthuneya wira kimwaakiherye. Kaahaana wira kimutanthe. Munnona? Ohiya wira yeeyo, kaahaana oliva mwaha wa yeeyo. Tivo, nto, vano hiyo. . . Eyo ti yooreera. Ti miyo, ni yooleleliwa vano. Nto ninookelela ohoolo. Munnona? Ayo.

Amosi, eversikulu 8 ela, “Mwatto iipaka taani ohinoova?”

355 Miyo kooxaya mutakhwani wa wAfrika. Miyo kootoko okhala mapuro amwatto yaaryaya. Owo ti mwene a axinama. Kootoko wummaathi mutakhwani ohiyu ni wiiwa okhuluma wa akhusupa, otheya ni orunya, ni—ni e—ni axinama oohiyana-hiyana. Ni nto akhusupa akina yaamwiiriha, anoohalela hata oriiriha ephome anyu yaakhulumaka. Ni yaahikhala ahavara, ni yiipulelaka, ni sothene sikina, ni makusupu, ni akhola, ni ilumpa, ni imaara ikonto ikonto sene, “orunya, waathama.” Weetta mapuro othene, munoowerya wiiwa inamuna sothene sa itthu siiraneyaka. Masi mwatto akhulume, hata makusupu ankhala oomaala. Omaaleleya wa okhwa. Awo ankhala oomaala. Exeeni? Mwene aya oroolavula. Amen.

356 “Mwatto iipaka, taani ohinoova? Muluku aalavulaka, taani ani ehilaleerye?” Muluku aalavulaka, profeta onookhuwelela. Moosuwela entthunaaka ohimya? Profeta eekeekhai onookhuwelela. Apatthani, Owo oolavula. Vano, soopattuxiwa sothene sa Omwene Awe siwiriyane etthu Owo ohimmyaawe.

357 Vakhala wira mwatto onniwerya osuwela wira yookhala etthu ehilonke, okathi owo oniipaawe, itthu sothene sa omwene awe sinoomaala. Iyo sinoowiriyana. Hata makusupu makhaani, nnaamwii, niryeene momweneni mwa mwatto yoowo. Wunla iwo wookumiha ephome wa khusupa, nlo ninoomaala. Etthepo ele vale, enwerya omutthepa mwatto, ni omusuusa airaka, “Wiiu! Wiiu!” Masi mwatto akhulume, eyo enoomaala ni weemela. Enari ya mutakhwani, enwerya osapa, enkhala wira enkuma mooro mphulani mwaya. Mwatto atuphela-ru yeeyo, hata khonvulaliha. Ncoco, ni nikula nawe na itonelaata thanu na mosa, omukhere, ni munupi awe muulupale. Mwatto akhulume, owo onimweemela mphironi mwawe. Exeeni eniireya? Mwene Awe oroolavula. Munnona? Owo onthuna wiiwa etthu enrowa ohimmwa.

358 Vano Muluku alavula vale, profeta onookhuwelela. Vano nto Omwene Awe owiriyane etthu Owo onihimyawwe. Muluku oolavula. Soopattuxiwa sothene sa Momweneni mw'Awe siiwelele etthu Owo onihimyawwe.


Nivekele.

359 O Mwatto a nihimo na Yuta, nvenye mukhulume! Nyuwo munookhuluma nihiku nla nookiserya. Maitho anyu aaphunyeya. Munweha vathi. Munoono etampi ya ela eniithaniwa elapo ni olumwenku wa oKristu. Nyuwo munoono etampi ya elapo ela, yeeyo ethummwe ni Ephome yooreeraxa. Nyuwo munoono moota miromolelo sinviraaya vasulu va Masu Anyu. Munoono moota maprofeta oowootha anoothaaya. Ekeekhai ya Muluku anookhoota.

360 Khulumani, o Mwatto a Yuta! Mutthuniherye maprofeta Anyu ekhuwelele. "Muluku aalavulaka, taani ani ehilaleye?" Awo ti Masu a Muluku ankhuma mBibiliani, yeetteettaka ovira mwa profeta. Onwerya sayi owo omaala? Owo aairale, owo aamphutuwasu kapatti-kapatti. O Muluku, mmutthuniherye profeta Anyu akhulume, Pwiya. Akhulume Mutthaka Anyu, Muluku, ni khula yoopattuxiwa ya Omwene Anyu ewiriyane.

361 Awo yeemele. Athiyana yeemele yiikohe murima aya. Alopwana yeemele yiikohe murima aya. Khula mulalelyi oniiwa efiita ela, eemele ni akohe murima awe, maana Mwatto a nihimo na Yuta onookhuluma. Ni Masu eekeekhai jaarweelaka maprofeta, anoolavula, anookhuwelela, "Murukunxe murima mutthike vahinatthi oxa."

362 Muluku, miyo kinvahererya Mutthaka, mufiitani ni mwa muthukumano ola onooneya, wa Nyuwo voosiis'ula, kiroromelaka wira Nyuwo munookupali. Ni mmwiitthane khula mwaana mulopwana ni muthiyana a Muluku, ori vathi... onrowa wiiwa efiita ela, wala vathi va oruma wa nsu, awo athikele orukunxa murima vahinatthi oxa.

363 Ni miyo kinnaamini, Pwiya, wira Nyuwo mwaanveleelinhe Amosi va, owo aamukhuwelela etthu emosaru. Maana owo khaakhanle ohikhuwelela... Masi owo akhala profeta a Apwiya, owo namalaleerya Masu. Owo onrummwa ni Masu, ni Masu, ni owo ti Masu. Vano, Pwiya, yiiraneye, mwa Nsina na Yesu Kristu. Amen. 

62-0513M Mweettelo Wa Profeta Eekekhai A Muluku
Branham Tabernacle
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org